

風節

高隱

兩浙名賢錄

二十二

兩浙名賢錄卷四十三目次

風節

漢

龍丘萇

嚴子陵光

會稽太守陳業

晉

何幼導準

沈道虔

子惠鋒附吳

司徒主簿王方平弘之

宋齊梁陳

顧景怡歡

沈雲禎麟士

唐

孫郃

靜樂先生方太初吳

五代

章魯風

白雲先生石延翰

僕射大夫何溥

謝金吾銓

宋

陸行正正

子應奇孫士賢附

兵部尚書陳存

國子博士杜文甫

提點刑獄游魯望汝

吳太學大有

金華令陳天瑞

修職郎章子壽鑄

吳子善思齊

義烏令周公謹密

安節先生徐英文俊

七民劉君用若濟

定成尉牟成甫應龍

軍成判官孫潼發

陳弘道宗儒

三教遺逸趙孟僴

葉仲凱

海門簿程元爽塏

芹澗先生蔣芸

正節先生衛富益

泖南放翁殷公源澄

介白散人劉弘宗揚祖

楊吉甫子祥

容州文學方韶父鳳

東山先生朱元之清

黃行素奇孫

金一之應桂

胡子廉

鄭玄璋時中

陶菊隱

杜若川濬之

壽岩老人欽德載

龍圖閣待制萬鍾

元

清節處士虞伯和如墳

姚君衛榮

溫日觀

呂徽之

蔣叔圭琰

純德先生陳天祺應麟

張克明

潛齋先生毛彥明輝

全閒老者王存道宏

水雲子汪大有元量

潘省中伯修

張子長樞

潘聲甫音

明

玄白先生黃觀成中德

石鼓山聾呂不用

練希魯

陶九成宗儀

李長民公毓

監察御史童守真

葉啓明子曉

張羽臯翺

三鄉老人葉子雲

廣西叅議張文衡銓

荆府長史施魯

太雀山人陳洛夫中州

給諫許台仲相卿

孝廉張文東涑

漢陽令董碩甫毅

兩浙名賢錄卷四十三終

兩浙名賢錄卷之四十三

東海徐象梅仲和氏撰

邾城何閔中罔卿氏閱

風節

漢 共三人

龍丘萇

龍丘萇太末人隱居九峯巖義不降辱王莽連辟不起更始元年在延爲會稽都尉掾吏白請召萇延曰龍丘生躬履德義有伯夷原憲之節都尉酒掃其門猶懼辱

馬寧敢召之。遣功曹奉謁，疾致醫藥，吏使相望於道。歲餘，延躬詣長，乃署儀曹祭酒，尋謝病去。

嚴子陵光

嚴光字子陵，餘姚人，一名遵，本姓莊，避顯帝諱，諱莊曰嚴。光少有高名，梅福妻之以女。光武微時，嘗與光同學。及卽位，乃變姓名，隱身不見。帝思其賢，下令物色之。後齊國上言，有一男子，披羊裘釣澤中。帝疑是光，乃備安車玄纁，遣使聘之。三反而後至，車駕卽日幸其館。光卧不起。帝卽其卧所，撫光腹曰：「咄咄子陵，不可相助爲理邪？」光不應。良久，乃張目熟視曰：「昔唐堯著德，巢父洗耳，士固有志，何至相迫乎？」帝曰：「子陵，我竟不能下汝邪？」於是升輿歎息而去。復引光入，論道舊故，相對累日。帝從容問光曰：「朕何如昔時？」對曰：「陛下差增於往，因共偃卧，光以足加帝腹上。明日，太史奏客星犯帝座，甚急。」帝曰：「朕故人嚴子陵共卧耳，除諫議大夫，不屈，乃耕於富春山。後人名其釣處爲嚴陵灘云。」

會稽太守陳業

陳業，上虞人。初爲會稽太守，潔身清行，遭漢中微，委官

去隱於黠歛間。朱育稱其高邈妙縱，天下所聞。

晉 共四人

何幼導準

何準字幼導，海鹽人。穆章皇后父也。弱冠知名，州縣交辟，不就。兄克驃騎，令準仕，對曰：「第五之名，何減驃騎？」蓋準第五也。克後居宰輔，權傾一時，而準散帶衡門，不與外事。徵拜散騎侍郎，卒，不就。後追贈金紫光祿大夫，加晉興侯子。惔以非父志，表辭不受。

沈道虔

子惠鋒附

沈道虔，武康人。性仁愛，好易老，隱居縣北石山下。孫恩亂後，飢荒為甚，道虔與諸孤兄子共釜庾之資，困不改節。州辟凡十二命，皆不就。宋文帝聞之，遣使存問，徵為散騎侍郎，不起。以琴書自娛。子惠鋒修父業，亢心希古，不應州辟。說者以為肖子。

司徒主簿王方平弘之

王弘之字方平，上虞人。仕晉為司徒主簿。家貧，性好山水。宋武帝辟召，一無所就。從兄敬弘為吏部尚書，奏弘之為太子庶子，不就。文帝時，又陳高行，徵為通直散騎。

常侍又不就。敬弘嘗解貂裘與之，卽着以採藥。性好釣，上虞江有勝地，名三石頭。弘之垂綸，其處經過者不之識。問曰：得魚賣否？弘之曰：亦自不得，得亦不賣。日夕載魚入上虞郭，經親故門，各以一兩頭置門內而去。始寧沃州有佳山水，弘之又依巖築室，及卒，顏延之欲爲作誄，恨短筆不足書美，誄竟不就。

宋齊梁陳

共二人

顧景怡歡

顧歡字景怡，益官人。六歲時，父使驅雀田中，歡因作黃雀賦，不復顧雀。食稻過半，貧無所受業，竊聽隣人讀書，悉記不遺。傳吳興邵元之經學，開館受徒，常百餘人。母喪，水漿不入口者七日。廬於墓次，齊主道成踐祚，迎歡稱山谷臣。顧歡表曰：道德綱也，物勢目也。湯武得勢，師道則阼；延秦項忽，道任勢則身戮。願稽古百王，斟酌時用，則率土之賜。臣志盡幽深，無與勞勢，請卽辭歸。帝賜麈尾素琴，有文義三十卷。

沈雲禎麟士

沈麟士字雲禎，武康人。虔之子也。幼俊敏，聽叔父岳談

玄無所遺失。岳撫其肩曰：若斯文不絕其在爾乎？及長，博通經史，居貧織簾，誦書口手不絕。鄉里號爲織簾先生。嘗行路，隣人誤認其履，麟士曰：是卿履邪？跌而反。後隣人得履，送前履，還麟士曰：非卿履邪？笑而受之。元嘉末，文帝令僕射何尚之訪舉學士，縣以麟士應選，不得已至都。何尚之深相接，謂子偃曰：沈麟士，黃叔度之流也。汝其師之，未幾歸吳。羌山教授從學者數十百人，各築室止其側，時爲之語曰：吳羌山中有賢士，開門教授，居成市。征北張永爲吳興守，請其入郡，麟士聞郡堂後有好山水，欲一觀之，乃往，停數月，永請爲功曹，麟士曰：明府德履冲素，留心山谷，是以被褐負杖來謁，必欲飾混沌以蛾眉冠，越客以文冕走，雖不敏，請附高節，有蹈東海死耳，不忍受此黥劓，永乃止。復歸羌山，負薪汲水，并日而食，終老讀書不倦，製黑蝶賦以寄意。梁天監中卒於家。

唐

共二人

孫郃

孫郃，奉化人，自幼負氣岸，博學高才。唐末爲左拾遺，朱

溫纂唐著春秋無賢人論卽脫冠裳服布衣超然肥遁
養晦林泉著書紀年悉用甲子以示不臣之義

靜樂先生方太初吳

方吳字太初淳安人生於唐末唐亡耻非所仕遯隱巖
谷中吳越錢氏招之不往聚徒講學於上貴精舍以終
其身鄉人化之稱為靜樂先生

五代 共四人

章魯風

章魯風桐廬人能詩與餘杭羅隱齊名錢武肅崛起以

魯風善筆札召為表奏孔目官不就執之沉於江後以
隱為錢塘令懼而從命因宴獻詩云一個襴衡容不得
思量黃祖漫英雄自是鏐始厚遇之

白雲先生石延翰

石延翰新昌人父渝兄延俸皆仕吳越錢氏翰獨耻之
隱居沃洲山白雲谷以書史自娛後贈白雲先生

僕射大夫何溥

何溥越州人識雲氣善地理為南唐僕射大夫貶休寧
尉未幾國亡溥大哭嘔血卽挂冠隱芙蓉山剪髮為頭

陀假跡禪門而不談內典喜讀道德經每歎曰老子真聖人也猶龍之稱仲尼寧虛借哉其有所譽必有所試矣居恒專煉火化後果以火得解脫

謝金吾銓

會稽人仕南唐歷官銀青光祿大夫金吾大將軍

李氏以國歸宋銓守義不辱挈家遁居祁門士論高之

宋 共三十六人

靖獻先生陸行正正子應奇孫士賢附

陸正字行正海鹽人今屬平湖正博學篤行通律呂象

數之學舊名唐輔宋亡與族父霆龍以家世宋臣矢不

仕元遂更名正御史程文海薦之不赴後復與處士劉

因同徵俱不赴隱居教授其學以慎獨存心為要所著

有正學編樂律考七經補註克己雜言凡八十餘卷卒

年六十七門人謚為靖獻先生子應奇字景祥郡守劉

澤民察其賢欲奏官之謝曰某老矣早喪先人失學不

願為官守笑曰名儒之子何言不學力辭而止孫士賢

字彥良樂善好施有意氣元末名士流落者如會稽楊

維禎宣城貢師泰錢塘陳彥博多客於其家

兵部尚書陳存

陳存，安吉人。累官至兵部尚書。端明制置使。宋亡，元遣使七徵不起。尋遘疾，却醫絕食，旬有四日卒。

國子博士杜文甫

杜文甫，臨海人。咸淳進士。歷瑞安軍節推。德祐初，除國子博士。宋亡，義不仕。元翰林學士趙與峕薦于朝，侍御史程文海奉旨宣召，皆以疾辭，終不起。自號南峯山民。

提點刑獄游魯望汶

游汶，字魯望，德清人。咸淳中，歷江西江東福建提點刑獄，俱有能聲。賈似道當國，時事大非。汶與論事，忠誠懇惻。至於流涕，遂罷官家居。泯迹草野。入元，抗節不仕。叅政蒲大年以遺老奏，召爲福州總管。堅辭不就。所衣一布袍，書其背曰：「前宋遺民。」大元百姓不問燕居，叙會晴雨寒暑，未嘗脫解論者，悲之。

吳太學大有

吳大有，嶧人也。寶祐間，游太學，率諸生上書言賈似道奸狀，不報。遂退處林泉。與林昉、仇遠、白挺等七人，以詩酒相娛。時人以比竹林七賢。元初，辟爲國子檢閱，不起。

卒葬戴顓墓左

秋金華令陳天瑞

陳天瑞臨海人咸淳進士師事金華王柏精性理之學

志潔行廉為金華令有能名宋末隱遯林壑詩文高古

效淵明書甲子文集五十卷

修職郎章子壽鑄

章鑄字子壽吳興人仕為修職郎諫直敢言宋亡歸隱

於家元世祖令故宋官納誥勅仍量授職鑄不就自以

世食宋祿坐未嘗北向宋人之仕於元者鑄皆絕之不

與往來世高其節

吳子善思齊

吳思齊字子善處之麗水人父遂官至朝散郎思齊少

穎悟以詞章知名由任子入官監新城稅調嘉興縣丞

善決獄訟未幾遷饒州節制司準備差遣時丞相賈似

道貴戚謝鏜力能生殺人思齊以小官中其諱惡人為

危之而思齊弗顧也俄不願仕寓居桐廬值宋改物家

無擔石有勸之仕者輒謝曰譬猶處子已嫁不能更二

夫也思齊天性直慤知有是非不知有毀譽每與婺州

方鳳福州謝翱游諸名山酒酣氣鬱輒望天末慟哭而返大德間卒年六十四

義烏令周公謹密

周密字公謹錢塘人寶祐間為義烏令入元不仕與趙子昂仇仁近戴表元為唱和友詩極典雅善画梅竹蘭石得意輒自題其上

安節先生徐英文俊

徐俊字英文德清人以明經為國子生咸淳中憤時宰誤國率六館諸生葉李等抗疏乞斬賈似道疏三上不報宋亡遜於林野至元中累召不起言及宋故輒泫然流涕及卒門人謚曰安節先生

七民劉君用若濟

劉若濟字君用青田人咸淳進士義不仕元自謂出於六民之外別號為七民

定成尉牟成甫應龍

牟應龍字成甫烏程人父巘官大理少卿應龍以父蔭當補京官讓之於弟未幾舉咸淳進士對策忤賈似道調定成尉宋亡不仕父子自為師友討論經學以文章

大家名於東南人稱爲隆山先生

軍成判官孫潼發

孫潼發桐廬人咸淳進士授衢州軍事判官有庶能聲辟御前軍器所幹辦公事未幾宋亡家亦毀乃避地萬山中採梠自給元侍御史程鉅夫奉旨搜訪江南遺逸以潼發應詔堅辭不起卒槁死巖穴時人義而葬之

陳弘道宗儒

陳宗儒字弘道自號樵同臨海人獻肅公之從子也平生尚節槩不苟取與伯父檢院念其貧割田贈之力辭不受吳丞相堅延爲上客每說之曰道不行志不遂尚復何待吳不省遂拂袖南歸竟與之絕金庾不繼咽水讀書聲出金石當時高其風

三教遺逸趙孟僊

趙孟僊宋宗室也其先家於黃巖文天祥見之曰瑚璉器也其後天祥開闢江東浙西俱辟以行及召赴闕孟僊留吳中僅五十日宋亡元兵執孟僊欲官之因辭以疾遂去吳依親友以居絕口不談宋事游情佛老號三教遺逸居嘉禾及天祥卒爲文祭之慟絕復蘓臨終口

占曰。王室之懿。文山之客。千古忠赤。端坐拱手而逝。所著有湖山汗漫集。

葉仲凱

葉仲凱。餘姚人。博涉經史。善屬文。咸淳甲戌。禮部正奏名。爲當國者所忌。罷會代。易終身不仕。或勸之曰。君未食宋祿。今仕元。何不可。而甘貧賤。仲凱對曰。吾聞周德雖興。夷齊不厭薇蕨。漢道方盛。黃綺無間山林。人各有志。奈何違之。勸者乃止。仲凱教授鄉里。敦篤之風。藹然。爲詩歌。寓廢興存亡之感。故老往往置不忍讀。

海門簿程元爽塏

程塏。字元爽。括蒼人。樟之四世孫也。調海門簿。慷慨激烈。每念世受國恩。宋亡。弃官歸。自傷亡國之臣。卽戴冠爲道士。建太極陽明書院居之。自稱神陽先生。

芹澗先生蔣芸

蔣芸。開化人。咸淳鄉舉。上疏論賈似道奸。不報。遂不就南宮試。而歸。宋亡。元累徵不起。人稱芹澗先生。

正節先生衛富益

衛富益。崇德人。有異質。識見高遠。不爲章句之學。聞宋

亡於崖山。日夜悲泣。設壇具祭文。天祥陸秀夫張世傑。詞極哀慘。觀者無不墮淚。嘗負笈往從金履祥學。深探易旨。決意不仕。隱居教授。創白社書院。會布衣友賦詩講道。縉紳不得就列。風度飄然。至大間。有司欲薦聞。不就。怪其迂。毀其書院。遂隱於湖之金蓋山。絕口不言世務。絕足不履城市。一日遘疾。悉焚所著書。曰。吾志晦迹。安用名世。卒年九十六。門人私謚曰正節先生。

柳南放翁殷公源澄

殷澄字公源。嘉興人家。富好施。見義勇爲。元兵壓境。澄猶保聚未下。元將大怒。命屠其城。澄仗劍扣軍門曰。民猶水也。水順則流。逆則激。民順則從。逆則亂。今將軍不廣好生之德。施不殺之威。顧欲盡剿斯民乎。元將怒。欲斬澄。厲聲曰。卽殺一人。活千萬人。死安足惜。辭氣益壯。元將感悟。一境獲全。丞相伯顏聞而義之。授澄軍民都總管。使守其地。澄曰。大宋之亡。吾以親故。不與俱亡。乃能覩顏以事仇讐乎。遂野服放浪。九峯三泖間。自稱柳南放翁云。

介白散人劉弘宗楊祖

劉揚祖字弘宗，慈溪人。幼有志操，穎悟絕人。舉景定三年進士，授崇文院校書郎。以不附賈似道，屢進屢退。積官禮部郎中，益勵志節。遇事敢言，時賈似道崇建臺榭，廣求名花異果，珍禽奇獸以實之。揚祖特疏論之，謂國步方艱，正大臣矢心戮力之秋，不宜忘經國大務，以坐待其斃。賈大怒，又欲斥之。會揚祖丁內艱，不果。自是國事日非，每扼腕歎曰：「人臣當與國同存亡，今大事已去，不可爲矣。」遂有肥遯山林之志。逾年而宋物改冠帶，哀勸及元，下詔求賢。揚祖不忍聞，遂徙家雲湖寺之東原。建介白樓以爲讀書之所，日與子弟輩講解經傳，議論規飭，皆正氣激發。墾田給食，自號介白散人，以示不臣於元。

楊吉甫子祥

楊子祥字吉甫，餘姚人。卓犖有奇氣，言行侃侃，必稽于道。江萬里異之，舉爲縣監稅，不就。教授海濱，學徒甚盛。遭宋亂，兵興避地西浙。時劉夢炎事元，爲吏部尚書，雅聞子祥賢，欲致之。子祥不顧東還，遇鄧牧、謝翱及方九思於臨安，相與弔古賦詩，徜徉湖山間。復有薦此數人

者。乃皆去歸其鄉。子祥歸姚柱門。著書垂二十年而卒。
容州文學方韶。父鳳。不願舉。鳳。不願舉。鳳。不願舉。鳳。不願舉。
方鳳。字韶。父浦江人。有異材。徧交海內知名士。以族子
任。試國子監。舉禮部。不中第。後以特恩。授容州文學。未
幾。宋亡。鳳遂絕意仕進。益肆爲汗漫游。北出金陵京口。
南過東甌海上。悼天塹之不守。顧翠華以無從。顧盼徘徊。
老淚如霰。鳳善詩。通毛鄭二家言。晚遂一發於咏歌。
音調凄切。不勝黍離之悲。臨沒。囑其子樛曰。吾死。可題
其旌曰。容州。示不忘宋也。宋末文弊。鳳頗厭之。嘗謂學
者曰。文章必真實。中正方能不朽。否則當與東華塵土
俱盡。所著詩三千餘篇。曰存雅堂稿。行於世。

東山先生朱元之清

朱清。字元之。富陽人。自幼力學。平居以道義自持。爲詩
文。務底平實。嘗與葉李同門。清賞其不凡。已而李以京
學生。叩閤斥言。宰臣賈似道。置公田。變楮幣。諸新法。非
便。得罪。投漳州。朋從莫敢往。省清獨往。與之訣。且爲具
凡飲食服用之需。俾所親護送出二千里外。及似道敗。
李免歸。清候之江上。相見無一語相勞。第勉之以風節。

自終元至元間李居左揆士趨附恐後清顧之漠然若
 未始有一日之雅者李亦念清不置數遣人迎致之清
 卒不往以布衣終其身所居在邑東山之下鄉人咸稱
 之曰東山先生

黃行素奇孫

黃奇孫字行素新昌人度魯孫也敦行誼有古風師事
 俞浙韓性避元隱居不仕所著有南明志蜩鳴集及輯
 其祖三朝言行錄藏於家

金一之應桂

金應桂字一之錢塘人博學能詞章宋末嘗為縣令宋
 亡誓不仕元隱居風篁嶺以書画自娛書學歐陽詢画
 學李龍眠非其人不妄下筆是以傳者絕少然識者以
 為尺璧寸珠不是過也

胡子蕙

胡子蕙嚴之淳安人也自幼慎重不苟言笑書過目輒
 成誦弱冠博極羣籍不肯一下筆作舉子文字既而聞
 呂東萊之學遂徒步往從之遊盡得其趣未幾宋亡歸
 隱不復慕仕進窮居樂道以終其身

鄭玄璋時中。壽昌人。少聰俊。博學善屬文。明五經。兼通子史。以漕試得舉。見宋鼎將移。嘆曰。吾其左衽矣。浩然有遯世志。遂居家不仕。研精覃思。作春秋指迷詞。旨高遠。開論後學。亶亶不倦。以經籍自娛。絕口不談仕進。人或問之。答曰。人生富貴利達。皆身外物。吾有先人薄田。弊廬。足以供飭粥。蔽風雨。讀書誦詩。足以陶性情。以樂吾生。豈不快哉。親授二子。各一經。皆有成立。嘗語之曰。吾友邵西坡詩云。取相封侯兒輩事。老夫只占月三間。功名之事。汝自爲之。非吾願也。

陶菊隱

陶菊隱。嘉興人。以號行。今失其名。德祐末。元兵南下。菊隱聞勤王之詔。散家財。招集義兵。以拒元。謁文丞相於軍。宋亡。遺士流寓者多。以爲依。戒子孫勿食元祿。當時同邑有趙孟僮。殷澄。稱秀州三義。

杜若川濬之

杜濬之。字若川。金華杜伯高之孫也。明春秋。領鄉貢。宋易世。矢不仕。元感激。自悼。作述志云。寧在百里步曲木。

不可息寧忍三日飢邪蒿不可食雖云食息頃便分淑
與慝志士當暮年聞道轉歷歷要使此一身如琢復如
滌整冠與納履微嫌費䟽剔未若瓜李地絕不見吾迹
矯行晦名寄食西峯僧寺以終

壽岩老人欽德載

欽德載吳興人仕爲都督計議官宋亡德載不肯送降
款元兵募生致之欲授以官德載裂其板授書卽遁隱
碧岩山中自號壽岩老人

龍圖閣待制萬鍾

萬鍾歸安人也仕至龍圖閣待制國勢日危致仕居家
元世祖三徵之終不起卒以農業老於橫塘之上

元 共十三人

清節處士虞伯和如墳

虞如墳字伯和義烏人世業儒師事王炎澤恬靜自守
不以利祿爲意薦授永嘉教諭不赴有司勉令應貢亦
以親老歸名聞集賢院昇以清節處士之號尚義好施
游心經史終老不倦

姚君衛榮

姚察字君衛幼敏睿長通經術尚書程璿器重之妻以女恩授永嘉簿不就賓興於京會賈似道專擅率太學生伏闕論之不報遂退里居元史宣慰來括請見說以仁則得衆勿放火縱兵人心自安史從之衆賴無擾史奏授慶元簿不受歸訂諸子作論孟直筆及范翰林奉旨訪求好人察爲舉首以母老力辭續薦俱不起扁所居曰心易尤精地理有雲外樵歌若干卷

溫日觀

溫日觀瑤瑤寺僧也宋亡出家豪飲不羈往往出憤世語善畫葡萄枝蔓皆合草書法時寫詩文於上人皆知貴重之性酷嗜酒楊璉真伽以名酒啗之終不濡唇見輒罵曰掘墳賊獨與揭斯侯相友善每過從輒飲飲醉輒抱庭前支離叟痛哭不可止支離叟揭所種松也

呂徽之

呂徽之號六松僊居人博學能詩文宋亡深晦不仕居萬山中以耕漁自給一日大雪出易穀於富家聞其分韻作雪詩有得藤字者苦吟不就不覺失笑主人怪焉延之入援筆立成有鶯鶯聲亂功收蔡峽蝶飛來妙過

滕之句、衆皆歎服、問其姓名、不畚留之、不可得、惠之穀、怒曰、我豈受不義之財者、必易之、卽刺船而去。

蔣叔圭琰

蔣琰字叔圭、青田人、居南田華野、宋中丞繼周之裔、自以家世宋臣、不食元祿、授徒自給、足迹未嘗至邑郭、詩文師韓杜、而天性孝友、人無間言、所著有葆光集。

純德先生陳天祺應麟

陳應麟字天祺、鄞人、淹貫經史、至曆數之學、無不究其指歸、人稱通儒、一日乘馬出、有失馬者、直前認馬、應麟

問曰、子亡馬幾何時、對曰、逾月矣、應麟有馬且數年、心知其非、不與辨、竟與之、挽轡而去、明日、馬從別得、乃請應麟叩頭謝、堦下、至元間、朝廷以安車召賢良、應麟語使者曰、吾祖宗世爲宋臣、子孫不忍食元祿、固辭不起、賜號純德先生。

張克明

張克明黃巖人、至正十三年、州里盜起、州將宋伯顏不花、出令集鄉兵掩捕、克明率子弟、以計襲取其首亂者二人、械送於官、民藉以寧、州將將上其功、克明謝曰、某

老矣因時僥倖以規利非夙心也遂隱居山中年八十一卒於家

潛齋先生毛彥明輝

毛輝字彥明括之松陽人博學雄辯總制孫炎薦署學事屢辟不起歎曰吾讀書學問自分檢身理家修德承祀以全歸焉吾志畢矣仕非吾節也平生愛菊遶籬種之終日把玩悠然自得策杖獨步入紫青山中卜地爲窳穴名曰全歸窩自呼曰介夫士友以其愛菊類陶皆稱之曰潛齋先生

全閒老者王存道宏

王宏字存道西安人博涉經史工文詞書法魏晉咄咄逼真中年崇事理學著易啓疑春秋辨證文有蓬窓集每自憤生丁元運隱而不仕其紀生仍用德祐年號以貫已卯先號半閒至永樂承平隨號全閒老者侍御鄭辰銘其墓以爲衢高世抱道不求聞達之士云

水雲子汪大有元量

汪元量字大有錢塘人當度宗時以善琵琶出入宮掖元兵入城賦詩曰錢塘江上雨初乾風入端門陣陣酸萬

馬亂嘶臨警蹕三宮洒淚濕鈴鑿兒童贖遣追徐福厲
鬼終湏滅賀蘭若說和親能佑國嬋娟應是嫁呼韓頃
之從三宮北去流滯燕京時有王清惠張瓊英皆故宮
人善詩相見輒涕泣元量嘗和清惠詩曰愁到儂時酒
自斟挑燈看劔淚痕深黃金臺迥少知已碧玉調高空
好音萬葉秋風孤館夢一牕寒月故鄉心庭前昨夜梧
桐雨勁氣蕭蕭入短襟世皇聞其善琴召入侍鼓一再
行駸駸有漸離之志而無便可乘也遂哀懇乞爲黃冠
世皇許之瀕行與故宮人十八人醢酒城隅鼓琴敘別
不數聲哀音哽亂淚下如雨張瓊英送之詩曰客有黃
金共壁懷如何不肯贖奴回今朝且盡穹廬酒後夜相
思無此杯元量旣還錢塘往來彭蠡間風踪雲影倏無
寧居人莫測其去留之跡遂傳以爲僊也人多画像事
之自號水雲子士流題詠其事

潘省中伯脩

潘伯脩字省中黃巖人嘗三舉於鄉至春官輒不偶遂
決志隱居教授以著書爲事旁通天文地理律曆之學
爲詩文皆寓微意嘗曰文章不關世教雖工無益也方

谷珍寇海上浙江叅政朶兒只班總兵至將盡屠邊海之民伯修挺身率父老詣軍前力爭之曰倡亂者獨谷珍爾吾民無罪也乃得免國珍聞其名欲降之不屈遂被害黃雲泉有言潘先生莫邪大劍也其光爍然足以動星斗其鋒鏘然足以破堅珉而不保其缺折之患雖然不害其爲千金之寶也可謂深得其爲人者矣

張子長樞

張樞字子長東陽人聰慧過人讀書過目輒不忘爲文務推明經史以扶翼教道尤長於叙事嘗別撰漢本紀附以魏吳載記續後漢書七十二卷三國之臣有能致節於其君者舊史或諱不書或書而失實或僅見於異代之史皆爲更定而於漢事必備載以詳正統或一事類說必參訂使歸於一是非疑似抑揚予奪咸有論著繫於各篇之後名曰訓志謂宋之亡也將相羣臣仗節死者固已有傳在史氏若卑官下吏士卒女婦之死者多史所弗錄乃詢諸故老俯采稗官得若干人爲宋季逸事若干卷朝廷取其書置宣文閣至正初右丞相脫脫監修宋遼金三史奏辟樞長史力辭不拜復以知制

詔兼國史院編修官召不就使者追之行至武林驛以病辭歸卒四方之士莫不高其風節

潘聲甫音

潘音字聲甫新昌人幼聰敏強記能文生甫十歲而宋亡見長老談匡山事卽潛然涕下及長讀夷齊傳擊節憤歎益以事元爲耻日惟杜門讀書談道多所自得後因訪弟元甫於義烏因往從草廬吳澄學泰定間澄以薦召欲行音勸止之不從遂歸築室南洲山中自名其軒曰待清隱居所著有待清軒稿

明

共十五人

玄白先生黃觀成中德

黃中德字觀成黃岩人幼穎悟受學於鄉先生潘伯修之門及伯修爲方氏所害乃歎曰人生於三事之如一讐其可以不復聞天兵至婺卽持書間道詣軍門請爲師復讐會方氏歸附事乃寢遂與其徒徜徉山水間不復有仕進意學者稱爲玄白先生

石鼓山聾呂不用

呂不用新昌人初名必用字則行嘗應元鄉舉有奇名

稍長悟曰吾家世宋臣事胡非義也遂更名不用字則耕率諸弟耕石鼓山下以奉二親已從金華黃潛學博涉經史爲詩文翩翩有逸氣時與宋漁劉基相唱和及基翊輔高皇帝屢欲薦之以聾疾辭晚年應經明行修辟授本學訓導時亂餘禮徑晦蝕率諸生綜釐蒐剔親爲䟽解且訂集朱子家禮行之一時翕然向化復以聾疾退居因自號石鼓山聾所著有得月稿牧坡稿力田稿

練希魯

練魯字希魯松陽人至正間父進官京師因叅省以宦籍就試中第無何元駕北陷魯方弱冠離亂南還不復有仕進意力耕以供子職遭母喪啜粥飲水哀毀逾節比葬廬墓三年高皇帝卽位詔天下賢才輔治有司以魯應聘力辭不起復命有司勸駕不得已至武林著辭病詩九律聲調悲壯思志哀鬱若不知其意之所在竟歸家閉門謝客復撰朝會樂歌六章則又若喜聖人之世出慶遭逢之不偶者然卒不一出以老死所著有崆峒集傳於世

陶九成宗儀

陶宗儀字九成，台之黃岩人。博稽宏覽，善古文，尤精字學。性度冲粹，與人無夷險佞直，一接以誠。平居寡言笑，至論古今人物，上下數千年，竟日不倦。至正間，浙帥泰不花辟舉行人，不就。遂避地松江之亭林，力畊自食。張士誠據蕪，擬署軍咨，堅拒不往。洪武辛亥，詔取天下人才，郡邑以宗儀應，又以病免。或謂讓之，歎曰：「一檄而喜，所以爲親祿不逮，養適增悲耳。况今賢良輩出，草莽之臣老死太平，幸矣。踰分之榮，其敢覬乎？」藝圃一區，果蔬薯藥，量給賓客。其餘地悉種菊，間遇勝日，引觴獨酌，花下歌所自爲詩，撫掌大噱，人莫測也。宗儀崎嶇亂離，幾二十年，喪葬祭禮備盡其力。人以孝稱，晚年尤好著述。世所共傳者，說郛一百卷，輟耕錄二十卷，書史會要九卷，四書備遺二卷。

李長民公毓

李公毓字長民，太平人。方國珍據有台溫，一時人士多附之。獨公毓杜門屏迹，若將浼焉，有所感，必於詩發之。洪武初，累薦不起。後以子茂弘貴，贈北京刑部主事所

著有藥所稿藏於家

監察御史童守正真

童真字守正、仁和人、永樂中、由貢生拜監察御史、巡按四川、忠誠端慤、風紀振揚、爲政不求近名、而孜孜奉公、惟知自靖、擢山東副使、食正三品俸、秩滿待次天官、當事者諷求一見、真不往、又使人至其邸、真托疾偃卧、不與交一言、遂徙官廣東、真卽解綬歸、貲橐單鮮、識者高之、

葉啓明子曉

葉子曉字啓明、括之雲和人、言行質直、處家端嚴、善屬詩文、甘心窮約、人或賂餽者、卽曰無事而受非義也、有司嘉其賢而上之、徵辟不應、

張羽臯翺

張翺字羽臯、仁和人、生而穎異、涉獵經史、流覽百家、至於推步天文、占望風氣、若有神授、宣德間、有潘中丞者、浙人也、將往南粵視師、素知翺有兵略、習占候、除室迎之、翺感知已、強與偕行、一日坐帳中、仰視片雲隱起、謂潘曰、事濟矣、烈風南來、乃克賊兆也、已而果然、多獲首

風節 卷之四十三
虜潘擬疏薦翱翱曰所以共事戎行者報知也。可以名爵相浼乎。竟逃去。易名晦迹。以終其身。嘗作詩自述曰。有意欲嘗干日酒。無心去傍五侯烟。其志可知矣。臨終語其子曰。吾推數循理。後人必有大吾宗者。翱死後數十年。而曾孫應祺。應祐。玄孫瀚。漁。洵。洽。溥。洲。皆相繼登高科。躋膺仕。人益服其先見云。

三鄉老人葉子雲

葉子雲世家青田。爲三鄉老人。正統間。閩寇竊發。沐溪等處。皆爲巢穴。朝廷命都御史陳詔提兵討之。子雲詣軍門。白曰。子雲請以三寸舌下賊。不煩隻旅。都御史許之。子雲單步見賊。諭以禍福。賊相顧咋舌。遂留子雲飲。夜出。四女子侍寢。并餉白金一盤。子雲悉謝不受。賊義之一夕。解散。子雲籍所弃輜重。并所掠婦人。四百口。上之幕府。事聞。議報以官。固辭逃賞。不知所之。

廣西叅議張文衡銓

張銓字文衡。仁和人。吏部郎中。信之孫。太僕丞瑛之從子也。成化辛丑進士。官刑部主事。爲人耿介。不阿剛方。直諒多挺挺。大節。時尚書南宮某。事多偏徇。銓據法執

爭不巳尚書心切憾之竟亦莫能奪冢宰屠公某者與銓有葭莩親銓絕不與通適屠有慶事僚友期與偕行銓義不往屠大憾之以爲輕已而銓恬然不顧也在刑曹十八年風節愈勵家貧甚其妻日糊紙鏹以給衣食竟以廉介不求出爲廣西叅議舟覆死於水

荆府長史施魯

施魯仁和人。心純志潔。學古守高。寧遯世違時而耻爲苟合。寧困窮沒齒而一毫之不義不可干也。正德初。以舉人仕爲荆王府長史。務以正道匡王。是是非非。介然不阿。王甚禮敬之。疏請增秩四品。以方嚴簡亢。不爲劉瑾所悅。矯勅致仕。瑾誅。詔徵魯復用。魯自以年及不應召。遂終老于家。而無一畦尺椽之藉。東西僑賃。不常非其義。弗受也。嘗有施姓書生。餉粟三十斛。求冒魯宗。魯曰。余惟不爲冒昧之事。以至於斯。固却之時。方絕糧處之晏如也。竟藜藿不給而歿。未歿前數日。操筆爲文。自誌其墓曰。吾懼文士之以虛辭溷我也。其不爲名高。又如此。

太霍山人陳洛夫中州

陳中州字洛夫，詔之曾孫也。敦樸好古，務爲高奇，自弱冠應試，屢列前茅。所作文論，遠近誦法，貢爲廬江教諭。復轉王山，以典起人文爲任，往與永嘉張少師游好。及謁銓選，永嘉令作清馥殿賦，將薦授館職，不屑就。作詩諭之曰：上馬伏波還未老，下車馮婦也堪羞。人稱其節氣歸來，結一室，依古木，下自號依樹老人。又稱太霍山人，每爲詩文，扶摺腎胃，如孟郊賈島，湏出不經人道語。以自羨，又嘗自題其小像曰：髯白子，生何暮，百請無一遇，動與世違靜，如泥塑人，以爲痴天然之素謝，多岐之迷，取一竅之悟，大明平世之民，義皇上人之步，咸謂實

錄云

給諫許台仲相卿

許相卿字台仲，海寧人。舉正德丁丑進士第，官兵科給事中，屬世皇新政，乃抗疏論政令不便者數事，先是中人張銳、張忠恣橫，法曹議在死律，內降欲當之贖金，相卿力爭之。又李賢以中貴張欽義子，襲錦衣指揮，林俊以正人被言者誣，相卿皆力言其非，是語剴切，多人所不敢言。至訾指上爲氣驕，志怠迥異初心云云，舉

朝皆爲昨舌，由是許給諫，直聲震天下。居一年，抗疏致仕。歸，縣官具輿臺，騶隸如常。相卿曰：「此役屬里閭，吾故里中人也。假令吾乘軒擁蓋，揚揚出里中，使吾父老親故走匿旁舍，此於事不當。吾誼已不入公府，毋徒患苦父老爲也。」堅却之。乃築室紫雲山中，巖居川觀，食力詠志，益務覃思墳籍，游心藝術之場。常製短箠，長笠以二，崔自隨。遇佳日，披蓑戴笠，身騎黃犢，往來阡陌間，喜與田翁野叟爲爾汝交。時就彼傾村醕，食脫粟以爲懽。或一言目爲貴人，輒投袂而起。縣官高其賢，爲樹表邑中。堅辭之不得，旣竣事，念當一往謝，則五鼓伺門入，向縣治再拜而去。時令卧未起，卒不能禮之。館舍部使者歲時存問，餉之金錢，輒推不受。元輔桂溪與相卿善，貽之詩有「九杞山人不出山，不將一字落人間」之句。相卿爲人豪邁，正直高視一世。林居三十年，海內咸傾仰之。中外薦者以十數。嘉靖己亥，以禮科給事中召起於家。部使者臨門敦逼上道，相卿力以疾辭。元輔爲書招之曰：「明天子在上，故人忝備政府，可強爲一出。」相卿報曰：「居高者勞，乃公方飽食無溷，乃公境不起。後海上變作，當」

路者就問籌策相卿爲口畫便宜事語多效其清風峻節老而彌壯士大夫識不識輒相敬慕咸以爲人中孤鳳云

孝廉張文東

張涑字文東海寧人生有異質方童時日誦數千言爲文詞采煥麗氣焰輝赫一時名輩咸推下之皆以爲王子安復生也辛卯舉於鄉時尚未冠英聲雋譽動於縉紳士大夫樂與之交藩臬大僚至禮於其廬世父嘗負官錢數百千無所償涑議斥產以代或曰若幸交當路一言而解何重惜齒牙而輕議先人遺業邪涑曰資產易得耳至於節槩一失不可復贖涑卽餓死不願也竟罄產抵之以是家益貧初涑爲諸生與童憲副漢臣方郡守九叙友善時稱三傑後兩人皆登仕籍閔涑窶處時時餽廩餼輒推不受或固餉之強至再三勉爲一受卽盛治具召其人至共飲食必盡其所餉然後已涑於世一無所屑與當路高談累日未嘗及時事抗志守高曠視塵表卽藜藿不給卓如也竟以阨窮不得志而歿卒年三十三詩文俊爽有奇氣所著有窮居集漢臣爲

粹行於世

漢陽令董碩甫穀

董穀字碩甫從吾先生澧之子也正德丙子舉於鄉嘉靖辛丑授安義令更令漢陽俱劇邑綏輯鎮定所部不擾介然守正罔突梯取容竟與上官枿鑿拂袖而歸耕於海上安貧樂志冲曠夷猶每值粒罄過午未炊散步澹墅湖濱採白蘋以嗅淡如也相知者或念其貧而周之一介不取空腹而歌聲如金石既而侍其父游王陽明先生之門獲聞良知之學精修深詣時稱高弟每喜陶靖節形影神釋之詩取蘓文忠水月不變之旨知者以爲陶蘓竝埒云所著有碧里四存前稿藏於家

張表翁

張齊芳

陸文談璋

兩浙名賢錄卷之四十三

南齊名賢錄卷之四

漢 陸文該

董敦字碩甫從平

靖平五授安義令

授介然守正固安

於海上安徐

其命其命

人為國

其命其命

兩浙名賢錄卷四十四目次

高隱

春秋

披裘翁

漢

張齊芳

陸文該瑋

三國吳

中散大夫嵇叔夜康

姚仲翁

張儼

晉

謝慶緒敷

夏仲御統

虞仲寧喜

張文君

孔德度沉

韓典齊績

張偉康茂

宋齊梁陳

樓知遠惠明

戴仲若顯

附 兄 毅

徐文楚伯珍

朱百年

妻 孔 氏 附

褚元璩伯玉

孔祐

子 道 徽 孫 總 附

杜景齊京產

沈處默顛

盛紹遠

沈徵

唐

張子同志和

陸魯望龜蒙

秦公緒系

羅萬象

五代

文通先生宋榮

嚴永

宋

趙仲困宗萬

周侃

和靖先生林君復通

兄子 宥附

卧雲先生管師復

弟師 常附

慎東美伯筠

賈耘老收

白雲先生周翊臣沂

大隱先生楊韓道適

正鄞江先生王君一致

竹隱老人潘亨甫祖仁

王應求說

子珩孫勳玄 孫正巳附

檜隱士趙十朋占龜

朱文昭黼

俞秀老紫芝

弟澹 附

史升之詔

茗溪漁隱胡仔

朱合甫聲

四明居士朱元翰

靜翁陳孟容鷗

周彥通

石室先生陸永仲維之

許梅屋棐

朱子益有聞

葆真子黃敦政璣

弟輔 附

泊宅翁方仁聲勺

薛寧仲高

從孫 岨附

花翁孫惟信

姚君愈獻可

兌光居士林崧孫

休休翁石成已余亨

孝隱先生樓文舉斗南

許少明景亮

蔣季莊璿

迴峯先生徐立之

雪溪先生常宜卿詵孫

南窓先生劉準

子汝 舟附

高節先生嚴君友侶

劉良佐應時

錢深雲塤

山南先生劉元益應龜

常召仲棠

弟棣附

元

李至隱寓

梅江徐天錫禹圭

弟禹疇附

王宗孚孚

弟宗附

王居正子中

碧厓先生吳一飛雄

唐仲暹光祖

蓬廬處士史摺叟公珽

董仲貞鎮

莘疇居士張燦

應子孚恂

葉本山林

謝彥實暉

耕雲處士周天常與昂

貞白先生吾子行衍

鄭處抑昂

文行先生鄧牧心牧

陳允文

何介夫景福

李寧之康

葉拙修孟傳

陳象賢子翬

黃伯成玠

大癡道人黃子久公望

董靖傳嗣杲

句曲外史張伯雨天雨

陳時敏

陳渭叟

梅花道人吳仲圭鎮

貞白道人朱景仁

沈元吉貞

雲林生崔彥輝

韓進之循仁

樗散生李孟言訶

居林子金建

顛公鄭君作天祐

章德一

子橫塘附

鄭彥淵謚黃子八公望

董獻齡

明

陳子才

施德華

呂宗學九成

薛原禮敬

汪師道與立

胡仲厚敦

夏義甫

楊大本立

少微山人陳德詢

董宗楚荆

紫芝老人俞子中和

竹溪逸民陳澗

歸全先生何德齡壽朋

烏性善本良

孫蔗田

包太
白附

王復初紹原

灌園生潘時雍

趙廷堅檜

香雪坡老人王用賢毓

文莊先生胡希華榮

王志道達

陳光大煒

陳孟熙雍

鄭壁夏
誠附

迂叟金宗實華

胡寶之拱壁

南園居士沈昌甫啓隆

向永修道淳

懶仙賈必明愚

周益褒陞

章克平總

溪雲先生錢珏

朱從儒

吳琬 友人王鼎贊

胡用良禎

袁良貴仁 補錄

岑子英俊

許半圭璋

寒溪子方元素太古

峴巖道人王貞翁埜

女藥屏附

王時雨澍

李文正端

孫循義附

王本澄潼

楊汝鳴珂

李用晦元昭邵汝宜穆生

終

兩浙名賢錄卷之四十四

東海徐象梅仲和氏譔

當湖陸澄原嗣瑞氏閱

高隱

春秋 凡一人

披裘翁

披裘翁不知何許人亦不詳其姓氏寒暑所服惟一裘因呼披裘翁隱於天目山嘗出採薪遇延陵季子見道傍遺金季子命翁取之翁投鏹於地瞋目而言曰何子

居之高視之下儀貌之莊語言之俚也五月披裘而負薪豈取金者哉季子謝之問其姓名不對而去

漢 共三人

張齊芳

張齊芳驃騎將軍意之子歷官中書郎無心用世退隱句章之靈山採山釣水以自適人皆賢之遂以其父之官名其山曰驃騎立祠祀焉

張儼

張儼餘杭人好學有賢德不樂榮利開圃種瓠以所買

錢造橋俗謂之葫蘆橋

陸文該瑋

陸瑋字文該錢塘人漢季時艱納祿歸隱於靈鷲山蓮花峯下

三國 共二人

中散大夫嵇叔夜康

嵇康字叔夜上虞人康早孤有奇才遠邁不羣而土木形骸不事藻飾博覽無不該通拜中散大夫常修養性服食之事乃著養生論所與莫逆者惟陳留阮籍河內

山濤預其流者向秀劉伶籍兄子咸王戎遂爲竹林之游世所謂竹林七賢也康嘗採藥遊山澤會其得意忽焉忘返至汲郡山中見孫登遂從之遊登沉默自守叩之不言康臨去登始曰君性烈而才儻其能免乎山濤將去選部舉康自代康乃與濤書告絕康性絕巧而好鍛居貧嘗與向秀共鍛於大樹之下以自給潁川鍾會貴公子也精練有才辯慕康造焉康不爲禮而鍛不輟良久會去以此恨之及是言於文帝曰嵇康卧龍也公無憂天下顧以康爲慮耳因譖康欲助母丘儉帝遂害之康將刑東市太學生三千人請以爲師弗許康顧視日影索琴彈之曰昔袁孝尼嘗從吾學廣陵散吾每靳固之廣陵散於今絕矣時年四十海內之士莫不痛之帝尋悟而恨焉康善談理又能屬文撰上古以來高士爲之傳贊又作太師箴一篇

姚仲翁

姚仲翁吳興人天性儉素種瓜灌園以供衣食鄉人尊之稱爲長者或有饋遺一無所受不得已而受者卽惠貧乏未嘗以一介自污瓶粟屢空澹如也

晉 共七人 以 一 自 我 無 果 異 空 靈 賦 也

謝慶緒敷

有 爵 豈 一 無 所 受 不 辭 也 而 受 者 唯 惠

謝敷字慶緒會稽人性澄靜寡欲入太平山十餘年辟命皆不就初月犯少微少微一名處士星占者以隱士當之時譙國戴逵有美才人或憂之俄而敷死會稽人士嘲逵云吳中高士求死不得風文對上古以來高士

夏仲御統

夏統字仲御會稽人幼孤貧養親以孝聞宗族勸之仕統勃然作色曰諸君待我乃至此乎自此不與宗族相

見後母病篤乃詣洛市藥會三月上巳洛中王公以下並至浮橋統時在船中曝所市藥諸貴人車乘來者如雲統並不之顧太尉賈克恠而問之統徐答曰會稽夏仲御也克使問其士風統曰其人循循猶有大禹之遺風太伯之義讓嚴遵之抗志黃公之高節克甚異之更就船與語其應如響欲使之仕即俛而不答克又謂曰卿能作卿土地間曲乎統曰先夏禹巡會稽山朝會萬國聖化猶存百姓感詠遂作慕歌又孝女曹娥其父墮江不得見娥投水而死國人哀其孝義為歌河女之章

伍子胥諫吳王言不納用見戮投海國人痛其忠烈爲作小海唱今欲歌之衆人曰善統於是足叩船引聲喉轉清激慷慨悲風應至含水漱天雲雨響集諸人相顧曰若不游洛水安見是人克欲耀以文武鹵簿覬其來觀統危坐如故若無所聞克等各散曰此吳兒是木人石心也統歸會稽竟不知所終

虞仲寧喜

虞喜字仲寧會稽句章人少立操行博學好古元帝初鎮江左諸葛恢荐喜懷帝卽位徵拜博士皆不就賀循爲司空先達貴顯每詣喜信宿忘歸自云不能測也太康中與臨海任旭俱以博士徵喜辭疾不赴咸康初內史何克上疏曰臣聞二八舉而四門穆十亂用而天下安徽猷克闡有自來矣方今聖德欽明思恢遐烈旌輿整駕俟賢而動伏見前賢良虞喜天挺貞素高尚邈世束修立德皓首不倦加以傍綜廣探博聞強識鑽堅研微有弗及之勤處靜味道無風塵之志高枕柴門怡然自足宜使蒲輪紆衡以旌殊操一則翼贊大化二則敦勵薄俗疏奏詔以散騎常侍徵之又不起喜專心經傳

兼覽讖緯，乃著安天論，以難渾蓋。又釋毛詩略，註孝經。爲志林三十篇，凡所註述數十萬言，行於世。

張文君

張文君，永嘉人，逸其名，隱居樂清丹霞山，修煉服食之事。嘗乘白鹿，吹玉簫遊諸峯，幽勝郡守王羲之慕其名，往焉。文君卽遁入山之苦竹中，羲之不得見而去。其地常有白雀飛翔，故更名曰白雀山。

孔德度沉

孔沉，字德度，山陰人，有美名。何克薦於王導，辟丞相司徒掾，瑯琊王文學，並不就。從兄坦以裘遺之，辭不受。坦曰：「晏平仲儉，猶狐裘數十年，卿復何辭？」於是服之。是時沉與魏顓、虞球、虞存、謝奉並爲四族之雋，而沉獨抗高，不仕，尤爲時流傾屬。

韓興齊績

韓績，字興齊，嘉興人。父建仕吳，爲大鴻臚。績好文學，以潛退爲搵布衣，䟽食不交當世。東土人士並宗敬之。司徒王導辟爲掾，不就。會稽內史孔愉䟽薦，詔安車束帛徵之，不起。卒于家。

張偉康茂

張茂字偉康會稽人以耕稼讀書為事不就徵辟與同郡孔愉丁潭齊名愉字敬康潭字世康時人號曰會稽

三康

宋齊梁陳

共十四人

樓知遠惠明

樓惠明字知遠金華人以篤行聞居金華山藏名遯跡宋齊之際連徵不起文惠太子以師禮請之不得已應命未浹月辭歸忽自金華輕棹西下及就道回之豐安旬日妖賊起屠其城豐安獨全人以此異之

戴仲若顥

兄毅附

戴顥字仲若達之子與兄毅並受業於父父歿所傳之聲不忍復奏各造新弄毅制五部顥制十五部傳於世顥嘗游桐廬居吳下又止京口黃鵠山後還剡宋文帝每欲見之不能屈嘗謂黃門侍郎張敷曰吾東巡之日當晏戴公山下也後卒葬剡所遺文有釋禮記中庸篇月令章句逍遙論等書毅字長雲仕為散騎常侍與父達弟顥並高蹈物外為世所稱

徐文楚伯珍

徐伯珍字文楚太末人少孤貧箬葉學書誦讀不輟遂通經史宅南去九峯山數里伯珍移居之庭除木生連理白雀雙巢戶牖論者以爲隱德之徵兄弟四人白首雍睦人呼爲四皓卒年八十四受業生徒千有餘人皆爲制服

朱百年

妻孔氏附

朱百年山陰人少有高情携妻孔氏入會稽南山以伐藥採若爲業以蕪若置道傍輒爲行人所取明旦已復如此人稍恠之積久乃知爲朱隱士所賣須者隨其所堪多少留錢取蕪若而去或遇寒雪蕪若不售無以自資輒榜船送妻還孔氏天晴迎之好飲酒頗談玄理時爲詩詠有高勝之言隱迹避人惟與同縣孔顛友善顛亦嗜酒相得輒酣對盡歡顏峻爲東揚州餉百年米五百斛不受後卒山中蔡典宗爲會稽太守餉百年妻米五百斛妻遣婢詣郡門固辭時人美之以比梁鴻妻云

褚元璩伯玉

褚伯玉字元璩錢唐人少高隱搥寡嗜欲往剡居瀑布

山下三十餘年。隔絕人世。王僧達爲吳郡。苦禮致之。伯玉不得已。停郡信宿。纔交數言而退。寧朔將軍丘珍孫與僧達書曰。褚先生滅景雲。棲不事王侯。自非折節好賢。何以致之。昔文舉棲冶城。安道人昌門。於茲三焉。却粒之士。餐霞之人。乃可暫致。不宜久羈。望其返策之日。蹙紆清塵。亦願助爲譬說。僧達答曰。褚先生從白雲遊。舊矣。古之逸人。或留慮兒女。或使華陰成市。而此子索然。爲朋松石。介於孤峯絕嶺。者積數十載。近故要其來。此冀慰日夜。比談討。芝桂借訪。荔蘿若已。窺烟液。臨滄洲矣。君欲見之。輒當申譬。宋散騎常侍樂詢。行風俗。表薦伯玉。加召聘。不就。齊高帝手詔吳會二郡。以禮迎遣。辭疾。上不欲違其志。勅於剡白石山。立太平館。居之。卒年八十六。

孔祐

子道徽孫總附

孔祐。山陰人。愉魯孫也。隱居四明山。嘗見山谷中有數百斛錢。視之如瓦礫。樵者競取之。則化爲沙土。又有鹿中箭來投。祐養之。創愈而去。復引羣來。依太守王僧虔。欲引爲主簿。不屈。子道徽少厲高行。能世其家。隱居南

山終身不窺城邑齊豫章王嶷爲揚州辟西曹書佐不
至鄉里宗慕之道徽兒子總亦有搯行凍餓自甘郡縣
徵辟皆不就

杜景齊京產

杜京產字景齊錢唐人少恬靜閉意榮宦頗涉文義會
稽孔顓清剛有峻節一見而爲歎交郡召主簿州辟從
事稱疾去除朝請不就與同郡顧歆同契東山開舍授
學會稽太守武陵王曄遣儒士劉瓛入東山爲曄講說
曄曰杜生當今之臺尚也京產請瓛至舍講書傾資供
侍子栖躬自屣履爲瓛生徒下食孔稚珪周顒謝淪並
致書以通殷勤稚珪與陸澄虞琮沈約張融表薦京產
曰竊見吳郡杜京產潔靜爲心謙虛成性通和發於天
挺敏達表於自然學遍元儒博通子史流連文藝沉吟
道奧掛冠辭世家業窮岩採芝幽澗耦耕自足薪歌有
餘確爾不羣麻衣藿食二十餘載雖古志士何以加之
謂宜釋巾幽谷結組登朝則崑谷含權薜蘿起忤不報
後以員外散騎侍郎召京產曰莊生持鈎豈爲白璧所
回辭疾不就

沈處默顓

沈顓字處默武康人幼清淨有至行慕黃叔度徐孺子之爲人讀書不爲章句著述不尚浮華常獨處一室人罕見其面從叔勃貴顓每還吳興賓客填門顓獨不往勃就見顓送迎不踰閭勃歎曰吾乃今知貴不如賤也顓內行甚修居家以孝友稱兄昂一名顓亦退素以家貧爲始安令相隨之任及昂卒採薪自資與家人并日而食怡然不改其樂或有饋梁肉者閉門不受建武二年徵太子舍人永元二年徵通直郎俱不就

盛紹遠

盛紹遠餘杭人梁封關內侯天監二年薨榮嘉遁開門受徒執贄稱弟子者數百人歿門人立碑以旌德業

沈徵

沈徵吳興之武康人法興之孫太子文學承學之子隱江口山孝弟力田累徵不起縣丞常慶表其所居爲茂德鄉

唐 共四人

張子同志和

張志和字子同、婺之金華人。始名龜齡，母夢楓生腹上，而產。志和，十大擢明經，以策干肅宗，特見賞重，命待詔翰林。因賜名志和，以親喪不復仕。居江湖，扁舟垂綸，自稱烟波釣徒。著書三萬言，號玄真子。說者以其文論道，縱橫謂之造化鼓吹。兄崔齡，亦有文學，恐志和浪迹不還，乃於會稽東郭買地結茆齋以居之一。閉竹門十年，不出。吏人嘗呼爲掬河夫，執畚就役，曾無忤色。所居草堂，椽柱皮節皆存，而無斤斧之迹。觀察使陳少游聞而謁之，坐必終日，因表其所居曰玄真坊。又以門巷湫隘，出錢買地，以立開闔。旌曰迴軒巷，門隔流水，十年無橋。少游遂爲荆造，行者謂之大夫橋。垂釣去餌，不在得魚。肅宗嘗賜奴婢各一，志和配爲夫妻，名夫曰漁僮，妻曰樵青。人問其故，曰：漁僮使捧釣，收綸蘆中鼓柁；樵青使蘓蘭薪桂竹裡煎茶。陸羽嘗問有何人往來，答曰：太虛爲室，明月爲燈，與四海諸公共處，未嘗少別。何有往來，性好畫山水，皆因酒酣乘興擊鼓吹笛，或閉目或背面，舞筆飛墨，應節而成。顏真卿以舴艋旣敝，請爲更之，答曰：倘惠漁舟，願以爲浮家泛宅，泝沂江湖之上，往來若

高隱
卷之四十四
雪之間、卽野夫之幸矣。其詠諧辯捷、皆此類也。然立性孤峻、不可得而親踈、率誠澹然、人莫能窺其際。嘗撰漁歌、憲宗圖真、求其歌、不能致。李德裕稱志和隱而有名、顯而無事、不窮不達、嚴光之比云。

陸魯望龜蒙

陸龜蒙、字魯望、長興人。嗜茶、置園顧渚山下、歲收租茶、自判品第、有別業在松江。時升舟設篷席、齋束書、茶竈、筆床、釣具、往來雲水間。自謂江湖散人。號天隨子。又曰甫里先生。自比涪翁漁父。江上丈人。後以高士召、不赴。所著有笠澤叢書二卷、詩文十六卷、行於世。

秦公緒系

秦系、字公緒、會稽人。天寶末、避亂剡溪、留守薛蕙訓、奏爲倉曹參軍、不就。客泉州、南安有九日山、大松百餘丈、俗傳東晉時所植、系結廬其上、穴石爲硯、注老子、彌年不出。刺史薛播數往見、致饋、而系未嘗至城門。其後東度秣陵、年八十餘卒。南安人思之、號其山爲高士峯。

羅萬象

羅萬象、分水人。隱於紫邏山。浙西觀察使李德裕使人

召之萬象聞之更逃入深山築白雲亭居之終身不出
五代 共二人

文通先生宋榮

宋榮義烏人隱居縣西覆釜山下通尚書春秋廣順中
累徵不就學者私謚曰文通先生其後有名柏者遷金
華之潛溪柏五世孫濂以大儒翊運洪武初放還嘗於
岩下建書院以誨宗族子姓名曰金山書院

嚴永

嚴永永嘉人初仕南唐歷顯官一旦避地藏衣冠於平
陽前倉青華山岩穴間為市人傭作以自給後朝使以
詔命物色得之永不得已於岩穴間取所藏衣冠以行
未幾復遯去竟不知所之邑人名其處曰嚴公岩

宋 共五十一人

趙仲困宗萬

趙宗萬字仲困山陰人博極羣書以進士應詔籍於春
官其天資蕭散於世故澹如也壯歲即築室於郡之照
水坊左瞰平湖前挹秦望畜一雀號丹砂引以為侶足
跡不入高門鼓琴讀書怡然自適者三十餘年祥符中

高隱 卷之四十四 十四
詔舉遺逸郡守康戩以宗萬薦尋被召乃曰吾老矣不足
足以任事因獻跛鱉傳以自見且請乞爲黃冠朝廷不
奪其志卽其家賜以羽服後十餘年卒宗萬神宇清明
識度夷曠終日凝澹若嬰兒真方外之士也然取捨去
就之際則確乎有不可奪者善八分草隸書通俞扁術
或辟穀導氣嘗爲詩曰斗懸金印心難動屏列春山眼
暫開蓋其志也

周侃

周侃永嘉人隱身東修篤行仁義真宗東帛徵之不起

郡人名其巷曰招賢巷終老於護國山中

和靖先生林君復逋

兄子宥附

林逋字君復錢塘人少刻志學問放浪江淮歸隱西湖
孤山真宗聞其名賜號和靖處士詔長吏歲時勞問逋
善行草爲詩孤峭澄淡嘗詠梅花有暗香疎影之句爲
絕唱詩每就輒弃稿或勸存之則曰吾終志林泉不欲
取名於時况後世乎居西湖二十年未嘗入城市杭守
王隨每與唱和李及薛映時往清談蓄二雀曉縱之雲
霄暮自入樊時泛小舟遊西湖諸僧寺客至則童子放

崔爲候。逋棹舟歸。臨終有詩云。茂陵他日求遺稿。猶喜曾無封禪書。卒葬舍傍。逋嘗識李諮於布衣。以爲公輔之器。逋卒時。諮守杭。爲服總。仁宗謚曰和靖先生。逋不娶。無子。教兄子宥。登進士甲科。仕終侍御史。

卧雲先生管師復

弟師常附

管師復。龍泉人。與弟師常。從胡安定學。俱有盛名。時稱二管。師復長於詩。隱居不仕。仁宗聞其名。召至。問曰。卿詩所得如何。師復曰。滿塢白雲。畊不破。一潭明月。釣無痕。臣所得也。賜爵。不受。歸。人稱卧雲先生。著有白雲集。行於世。

慎東美伯筠

慎伯筠。字東美。西安人。豪於詩。應貢京師。至禮部貢院。見棘圍嚴甚。慨然曰。是非所以待天下士也。拂衣歸。縱遊山水。以詩酒自娛。嘉祐間。有盛名。韓琦薦之。與林和靖俱至。伯筠留京師。一日遇鬢髻道人。傾蓋如故。談論累日。人莫能解。自是不復飲酒。亦不作詩。未幾竟潛去。不知所終。王逢原嘗贈以詩曰。世網挂士如蛛絲。大不及取。小綴之。宜乎侗儻不低歛。醉脚倒踏青雲歸。前日

才能始誰播，一口驚張萬。誇和雷公峭，句不姿媚天骨。
老硬無皮膚，人傳書染莫對當。破卵驚出鸞鳳翔，間或
老筆不肯屈。鉄鎖急縛蛟龍僵，少年奇氣狂不羈。虎脅
插翼白日飛，欲將獨立誇萬世。笑謂李白爲顛兒，四天
無壁才可家。醉膽憤痒遣酒拏，欲偷北斗酌竭海。力拔
太華鑿鯨牙，世儒口軟聲如蠅。好於壯士爲忌爭，我獨
久仰願得見。浩歌不敢兒女聲，讀是詩亦可見其槩。

賈耘老收

賈收字耘老，烏程人。有詩名，與蘓子瞻交善。其居有水
閣曰浮暉，子瞻遊道場山回，值風雨泊舟登浮暉閣，命
官奴秉燭掃風雨，竹於壁間收素貧。子瞻每念之，嘗寫
古木怪石書其後，以贈云。今日舟中霜寒，十指如懸槌，
適有人致嘉酒，遂獨飲一盃。醺然徑醉，念處士貧甚，無
以慰其意，爲作古木怪石一紙。每遇飢時，輒一開看，飽
人否。若吳興有好事，能爲君月致米三石，酒三斗，終君
之世者，當便以贈之。不爾，可令雙荷葉收掌，湏添丁長
以付之也。雙荷葉耘老侍姬添丁耘老之子也。後耘老
作亭以懷蘓，名之有詩一編，號懷蘓集。

白雲先生周翊臣沂

周沂字翊臣，江山人。趣尚高遠，隱身不仕，號白雲先生。少與趙清獻、林同席研書，林甚敬之。既登政府，欲一見沂。沂因入都，扣門大呼曰：「我欲一見趙，四閭吏大驚走。」白拊拊曰：「周先生，天下士視軒冕如土，豈知有我哉？」整襟肅入，延之上坐，強留邸中，清言數日，不及世務，竟納履去。

大隱先生楊韓道適

楊適字韓道，慈谿人。篤學力行，不求聞達，躬耕養親，非義之饋，一介不取。鄉隣有盜其稼者，人告之，適愀然曰：「彼窮厄求採其生耳，勿問也。」盜者聞之，慚悔，自是一鄉之中，無復草竊。孫沔出按兩浙刑獄，召之，不赴。遂之越，川居崑觀者四十年，望重一時。仁宗詔求遺逸，太守鮑軻以名聞，賜粟帛。太守錢公輔又薦之，授將仕郎，試太學助教。州遣從事致書，具衣冠車從以迎之，辭不受。遜還大隱山，鄉人尊之曰：「大隱先生。」卒年七十六。

鄞江先生王君一致

王致字君一，鄞人。與楊適、杜醇爲友，俱以道義化鄉里。

諸生子弟師尊之皆稱爲先生年踰七十樂道安貧妻收遺棄子拾墮薪浩然無悶聞其風者莫不傾慕之仁宗朝詔天下立學有文材道義者與本州校官致辭不受宰臣陳執中奏錄致文得一百八十篇藏之秘閣卒葬邑之棲鳳山王安石題之曰鄞江先生之墓

竹隱老人潘亨甫祖仁

潘祖仁字亨甫金華人好學能文自號竹隱老人子女七人獨以身教清素之風行於一家嘗放杖乘七發作七進詞以見志卒年九十餘

王應求說

子珩孫勳玄孫正已附

王說字應求鄞人王致受業弟子也隱居教授餘三十年建書院於桃源鄉以居四方來學之士熙寧九年神宗特恩補將仕郎試州長史不受御書桃源書院四字賜之說無田以食無桑麻以衣怡然自得子孫世其家子珩宗正少卿孫勳廣南市舶一錢之利皆歸有司不識舶貨之名及卒賈胡率錢二百萬爲賻子正已却之曰吾父以廉直聞雖貧猶能負喪以歸不媿廉叔度也清白之傳皆致之家訓正已終大府卿

趙占龜字十朋占龜

趙占龜字十朋黃岩人志尚超卓與石尚書公弼李叅政光為內外兄弟二公貴無一字相通其介如此家有軒面植雙檜人稱為檜隱士宣和寇亂動以火攻獨於是軒相戒無犯

朱文昭黼

朱黼字文昭平陽人學於陳傅良不事舉業躬耕於南蕩山抱其學以終嘗著紀年備遺始堯舜迄五代至呂武莽丕朱溫皆削其紀年以從正統曰吾為書之志也

葉水心為之序

俞秀老紫芝

弟澹附

俞紫芝字秀老金華人弟澹字清老二人志操修潔引身不仕秀老恬靜而清老頗使酒好歌秦少游作紫芝字叙稱金華居士又黃魯直答清老寒夜三詩末一首云牧羊金華山早通玉帝籍至今風低草氾氾見白日金華風烟下亦有君履迹何為紅塵裏頰鬚欲雪白蓋黃上世亦出金華云

史升之詔

史詔字升之，鄞人。父簡，母葉氏，遺腹子也。應秀豐下，少有大志。從鄉先生樓郁學，以孝行聞。遇大比，輒引避。嘗曰：無母氏之節，已無史氏矣。誓終身母子不相離。或曰：取薦，所以榮母也。詔曰：朝廷設科，思得其用，敢竊爲己榮邪？設與計偕，則初志爽矣。况忘親欺君，士君子所不爲也。大觀二年，詔舉八行，鄉人以詔應命，遂與母避於縣東大田山。郡守迹所往，迫使就道，誓不起。鄉人稱爲八行先生。以孫浩貴，累贈太師、越國公。

茗溪漁隱胡仔

胡仔，烏程人。少無宦情，自號茗溪漁隱，閉戶讀書，留心吟詠。取古人詩考之，傳記作藜話百卷，詞林稱其博雅。

朱合甫聲

朱聲，字合甫，永嘉人。隱於江北合山，穴崑以居，作合山游，數千言，號歛子。有隱堂，非其人不能履其闕。郡守周延雋數致問遺，悉不受。曰：吾不忍以身爲溝壑也。

四明居士朱元翰

朱元翰，義烏人。卓犖不羣，博通經史，爲文必根理要，紹興中嘗獻賦行在，言切時政，不報，遂隱遁終身。自號四

明居士

靜翁陳孟容鶴

陳鶴字孟容義烏人志趣高邁不喜自銜靖康初游太學京城陷束書東歸結茅於雞鳴山之陽采蔬拾薪以奉其母而母亦惟然忘其食貧也自號靜翁有詩稿五卷

周彥通

周彥通永嘉人豫之長子也當恩補避匿弗出父沒貲產貨財一無所取結廬謝池未嘗交俗歲嘗蔬食鄉里

親戚推其忠信篤敬過其門知爲隱居人其堂知爲君子

石室先生陸永仲維之

陸維之字永仲餘杭人丰神雋拔議論侷儻少以計偕入汴羣法從邀與雜坐命相者某道人視之道人指維之曰秀才叩以科第則曰且歸山道人揖別贈以粒丹緩急用之陸下第南歸舟循汴風激浪湧舟將不勝以丹投之風浪始息汴上有呼其姓名者則道人也維之遂有超世之志隱於大滌洞天石室人因以石室先

生稱之。逍遙林谷，詩酒自樂。光堯嘗召之，稱疾不起。後光堯幸大滌，憲聖亦侍。羽流起居，問以山中詩客，以維之對。進其詩，光堯讀數首，太息曰：布衣入翰林，可也。欲與孝宗言，憲聖曰：山林隱士，必不要人知，要他出去，却是苦他，遂止。未幾卒。有石室小隱集三十卷行於世。

許梅屋斐

許斐，號梅屋，世居海鹽之秦溪。業儒，博通內外典，不樂仕進。居分四榻，前垂簾，懸白傅、坡仙二像。後儲書數千卷，編嗜筆研，黃朱墨卿，校讐無虛日。每有題著，必撫几嗟賞，謂語意天出，不知前有古人。今有作者，別築小圃於秦溪之北，徧植梅花於四簷。花時，雪霽月升，淡香疎影，不減羅浮。適有張生自雁宕抱棊來訪，對梅一搥，恍然太古之音。贈之歌曰：抱棊來兮雁山低，抱棊歸兮雁山崔嵬。卜居西湖之涯兮，身伯牙兮心子期。每自稱曰：四壁天地萬卷春風，庾嶺香孤山玉樂，而可以忘死。殆振奇人也。所著有梅屋稿、獻醜集，并樵談若干卷。

朱子益有聞

朱有聞，字子益，浦江人。幼孤，長能刻苦爲學，夏不揮筆。

冬不擁爐，久之淹貫百氏，無所不通。作文尚質實，有理致。方其搦筆，曲折自如。甘貧，味道。視富貴，一無所屈。冷丞而下，欲見之，不能得也。呂祖謙名重一時，知其有守，而多聞訪之。逆旅中，再以書速之，竟不往。淳熙十六年卒。

葆真子黃敦政璣

弟輔附

黃璣字敦政，金華人。少剛直，負高世之志。與弟中輔齊名，以早失所怙，絕意仕進。建炎初，嘗從舅氏宗忠簡。一至汴京，忠簡將授以官，謝曰：「璣之來，豈為覓官邪？」即辭歸。追贈白金數錠，計所用，取之返。其餘後忠簡必欲官之，奏補迪功郎，卒不受。老於家，號葆真子。

泊宅翁方仁聲句

方勺字仁聲，金華人。隱居湖州西溪，號泊宅翁。取張志和浮家泛宅之語而反之，以見志。潘良貴嘗贈之以詩云：「學道悠悠未見功，敢云凡質有仙風。他年一鉢江湖去，先向茗溪訪葛洪。」詩序稱其超然遐舉，精神散朗，如晉宋間高士。其詩文雄深雅健，追古作者。所著有泊宅篇十卷。

薛寧仲高 從孫嶠附

薛高字寧仲永嘉人任蓮城簿弃官而隱讀書作文至老不休家有讀書樓陳謙贈之詩萬卷編抄高似屋一門師友重如山之句從孫嶠字賓日登寶祐第調長溪簿一日亦掛冠曰非所好也科目以世其學耳一行作吏雅道遂廢日以詩酒自娛且自營竈藏自作挽歌人稱其達以比司空圖

花翁孫惟信

孫惟信婺人工詩喜談謔嘉定初嘗於大雪中登廬阜絕頂盡得其景物之詳作紀游卷弃官不仕隱居武林湖山間自號花翁病沒安撫使趙與憲葬之湖上

姚君愈獻可

姚獻可字君俞義烏人隱居郭西門葉尚書適布衣時嘗訪之獻可曳破履出迎如舊識臨歿預以書告適曰我能守義不屈子幸爲我銘及卒適銘稱其孤騫自潔至老益加所著有西園雜稿

兌光居士林崧孫

林崧孫字喬瑞安人幼孤力學長於易詩與陳鵬飛友

善鵬飛。貶死。遂息意仕進。自號兌光居士。與沈琪韓汝翼修古故事。保墳墓。以厚風俗。後進言典刑高尚之士。必稱之。

休休翁石成已余亨

石余亨字成已。新昌人。登咸淳進士。仕於鄞。於衢。已而弃官歸沃洲。自號休休翁。避丙子之亂。奔走萬山中。更號遁翁。平生自喜爲詩文。孫樸欲梓遺稿。弗許。曰。聊以適吾意耳。未必名家。已而慨然曰。吾家更八九世。皆不失素業。至余身益窮。今老矣。然不辱於盜賊。不死於道路。獲奉遺體。下從先君于九原。亦幸矣。因預爲之銘。銘曰。膠膠乎。申申乎。將久存。以瘁余形乎。寧亟歸。以全余真乎。悲夫。

孝隱先生樓文舉斗南

樓斗南字文舉。義烏人。天資渾厚。制事有繩墨。人有爲不善者。惟恐其知之。少遊太學。晚以特科補官。非其志也。再調台州司理。辭不赴。取白樂天詩語題所居曰。中隱。以歸老焉。事母至孝。治家圃。奉母嬉娛。後母沒。築堂縣東門。號望雲。旦夕瞻慕。終身不衰。鄉人稱之曰。孝隱。

先生

許少明景亮

許景亮字少明瑞安人景衡之兄身長八尺眉目踈朗望之偉然兒時日誦數千言弱冠游太學文辭秀出三試禮部不中爲治說二十篇上之不報浩然有歸志曰君臣之義不可廢也遇不遇命也遂退隱郡邑具禮交聘堅不起年八十餘無疾而逝

蔣季莊璿

蔣璿字季莊慈谿人閉戶窮經不妄與人接高閎居明州每過訪其廬輒相對小室極意講論自晝竟夜殆忘寢食或問閎曰蔣君不多與人周旋而獨與君厚何也閎曰閎終歲讀書凡有疑未判與闕而未知者每積至數十端輒一叩之無不響答蔣君所長他人未必知之閎得爲知己幸矣

迴峯先生徐立之

徐立之舊名炳學老子法隱於西湖之迴峯人稱迴峯先生通判都官員外郎蘓爲嘗謂之曰何不仕乎曰若時與命會可以佐天子福元元不然悔吝生矣曷若追

冥鴻霧豹與孤雲俱爲敬其言爲之著傳廻峯今雷峯也

雪溪先生常宜卿詵孫

常詵孫字宜卿謚忠毅同之孫也宋季多故隱居著書公府交辟俱不起所著有天閑雜著櫟齋筆記雪溪稿門人稱雪溪先生

南窓先生劉準

子汝舟附

劉準鄞人自幼好學少長遂博通經史宋末國事日非絕意仕進隱居教授門徒常數十百人以甬東負郭非隱者居卽築室青山之原左圖右書日以研窮典奧爲事學者稱爲南窓先生子汝舟字端甫確守父訓平居無戲言情容郡之名士大夫相繼來居一時林下衣冠爲盛剝啄問奇者戶屨常滿汝舟用呂氏鄉約身率而推行之苟非其人輒謝絕之不附權勢不事請託不入城府不語及州縣得失務本節用有餘則以濟人說者以比管寧

高節先生嚴君友侶

嚴侶字君友子陵三十五世孫也生有奇氣研精讀書

不以應舉名人勝士過釣臺者必訪之炙炭煮茶清論終日或勸之仕則曰漢雲臺諸將仕非不赫赫今子孫無聞焉吾鼻祖去今一千三百餘年而高風遠韻與桐江山水相爲流峙侶不敏願爲嚴陵賢子孫足矣居家教授從遊者甚衆一日與文丞相客謝翱雪夜登西臺驪酒慟哭以鉄如意擊石曼聲楚歌響振林木人莫能測其意暮年建汝社爲會取晚而有信之意翱卒無子與社中友買地南臺葬之築許劔亭於墓左嘗游錢塘偕胡石塘仇山村過孤山醉林處士岳鄂王墓卒有動於中告二賢曰吾常時如是親必不安亟歸及室而父死擗踊氣絕者數四旣葬廬墓三年不脫衰經不見賓客有白燕巢於墳木事母益虔母卒哀毀成疾幾不起每至生日服墨衰哀慟踰他時至順辛未卒年六十門人私謚曰高節先生從祀祖祠揚維禎銘其墓

劉良佐應時

劉應時字良佐慈谿人性敏而勤於書無所不讀隱居林下刻意於詩興寄蕭散范至能深賞之以爲孟郊賈島之流所著有願庵稿

錢深雲墳

錢墳字深雲世居東錢湖之里讀書尚節槩不求仕進力耕食貧裕如也晚年別築一室手植松竹以自況日與同里高友文橫經講道得一善則服膺不忘鄉人敬其隱德皆尊之曰先生而不名

山南先生劉元益應龜

劉應龜字元益義烏之青岩人少恢疎落落多大志成淳間游太學馬丞相高其材將妻以女應龜不可由是名噪一時又之以優陞解褐目擊時艱不欲以身為殉

遂退隱於南山之南人稱山南先生所著有夢稿痴稿

凡二十卷

常召仲棠 弟棣附

常棠字召仲同之曾孫也家於澉川身棲海岳志薄雲霄蹢躅無儔浩然自得時值宋季朝野穢淆戕民征利每竊歎曰東南其夷乎閉關不仕苦心篤學善屬文繞庭種竹數百竿以厲操自號曰竹窓所著有澉水志三卷其秀野堂記尤工文多不錄弟棣亦能文善書嘗書此記時稱二絕

元 共三十八人

李至隱寓

李寓字至隱東陽人性恬淡質直嘗習辭賦為舉子業宋亡遂隱居不事進取日以文史自娛手不釋卷老而彌篤嘗曰讀故書如對故人得新義如得知已樂以忘憂不知齒之既暮也壽逾一百一歲而終所著有隱居雜稿

梅江徐天錫禹圭

弟禹疇附

徐禹圭字天錫鄞人與弟禹疇皆刻厲好學家貧無書晝抄夜讀雖躬耕畝弗倦於勤受業於汪元春兄弟自相琢磨蔚成名儒禹圭嘗兩中浙江鄉試以母老不仕隱身教授時程端禮歸老於家相與討論默契心融生徒從者遠近如歸門人因其里居咸稱曰梅江先生禹疇字天彝亦嘗試藝於鄉值元季遂隱居泉石講學授徒餘五十年弟子有三世從之者為人沉默無疾言遽色年八十四卒

王宗孚孚

弟宗尹附

王孚字宗孚山陰人蘭亭書院山長中元之第五子也

孝友淳樸、動遵禮度、爲後進楷模、以先世有田廬在菱湖之上、時方擾亂、遂同昆季渡娥江、寓焉、杜門畏影、晚年益敦友愛、與弟宗尹、哦吟自怡、相繼而終、俱無子、隱德無傳、人共惜之、孚有山林餘興詩稿。

王居正子中

王子中、字居正、武康人、博學能詩、有超世之志、每閉戶、獨吟、不屑仕進、一時名士如柯敬仲、虞伯生、皆相善、率多唱酬、有掛蓑吟三卷行於世。

碧厓先生吳一飛雄

吳雄、字一飛、諸暨人、志趣高遠、不屑與世浮沉、閉戶讀書、精研墳索、一言一動、輒以古人自期、嘗辟本州儒學正、高卧不起、時人稱爲碧厓先生。

唐仲暹光祖

唐光祖、字仲暹、其先金華人、父以仁、從聞人夢吉避地永康、遂家焉、仲暹幼承家學、長從李草閣游、學問淵源屬文典雅、隱居教授、儼然以師道自尊、號委順夫、所著有委順夫集。

蓬廬處士史楮叟公珽

史公珽字楮叟，鄆人。學通諸經，尤精易理。作文典則，名重一時。同里鄭奕夫以道學文章自命，每有論議，必俟公珽鑑定，然後出藁。隱居教授者數十年。程端學薦主甬東書院，遂奔去。遊西州，寄典吟詠，以陶寫性情。每對人論宋季臺閣故事，亶亶不倦。及忠臣義士死節者，必慷慨流涕。廣平李堯民七喪不舉，公珽傾橐賙之，且爲著哀辭，告其常所往還者，自號蓬廬處士。所著有蓬廬稿、易演義及象數發揮若干卷。

董仲貞鎮

董鎮字仲貞，海鹽人。博通經術，有用世之志。值元亂，遂隱於海寧之泉山。每夜靜月明，輒登山頂，劃然長嘯，風生海湧，聲聞數十里。或悲歌慷慨，繼之以泣。歸輒閉門，竟日臥，有慕其名者，扣戶謁之，相對危坐，終日不出一言。人以爲不可測。

莘疇居士張燾

張燾，燦人也。少孤立不凡，自以家世宋臣，絕意仕進。作休休吟以見志，自號莘疇居士。所著有記蹟錄，每日所行必書之，以自考。至老不輟，當時稱爲篤行君子。

應子孚恂

應恂字子孚，永廉人。純樸好古，博涉書史，力耕自足，一介不苟，取於人訓誨子弟，與教授門生，必依於孝友忠信。嘗自贊曰：不能執中，寧過於厚；不能有爲，寧過於守。約身畎畝者數十年，清貞之操始終如一。所著有純樸翁稿。

葉本山林

葉林字本山，錢塘人。喜讀書，詩文得古體，性不苟合，布衣飄然，遊天目至九鎖山，築小室溪山間，有終焉之志。每遇積雪，登岩谷四顧，月下獨步，林影間，深夜忘返。里人鄧牧與林深相得，每月夜往來相與劇談，弗往，牧則自至。大德丙午正月一日，無疾書偈案上，泊然而化。

謝彥實暉

謝暉字彥實，先資陽人。識見通敏，受業胡長孺之門，以德業自勉，或勸習舉子業，答曰：學以博通古今，資文行耳。仕奚所急哉！時趙文敏以書名天下，見而愛之，授以書法。一臨池，遂得文敏之神，爲詩文簡淡雋永，尤長尺牘。人得其片楮者，以爲拱璧。暉亦不自秘惜，求輒應之。

有所不可。雖貴勢不能動也。與人交必以義。人有一善必揚之。藩帥郡將請門請交。未嘗造謝。每相對清言。終日一語不及私。說者謂隱不違親。貞不絕俗。暉實有焉。耕雲處士周天常與昂。谷曰。周與昂字天常。遂昌人。隱居桃源五峯之下。通史籍。精卜筮。以耕雲處士自號。終老丘園。足未嘗一入城府。手蒔松竹梅於屋側。以養歲寒之志。有古逸民風。

人貞白先生吾子行衍

吾衍字子行。其先太末人。從父游太學。遂居錢塘。性高

潔。博通子史百家。篆隸逼秦漢。詩效李長吉。雖性曠。少檢。眇左目。跛右足。而風度醞藉。一言一笑皆可喜。對客吹洞簫。或弄鉄如意。或援筆製字。旁若無人。每自北郭忠恕隱居。教授獨處一樓。坐學童樓下。遣高弟子遞授之。客至。童子輒止之。俾登乃上。庶訪使徐琰來訪。衍從樓上呼曰。此樓何可當貴人登邪。願明日走謝。琰素重衍。笑而去。竟亦不謝也。後以無妄被逮。義不受辱。赴水死。謚曰貞白先生。所著有尚書要略。九歌譜。聽玄造化集。十二月樂詞譜。重正卦氣。楚史。檣杌。晉文春秋。道書。

援神契石鼓詛楚文晉釋閒中編竹素山房詩集說文續解

鄭處抑昂

鄭昂字處抑平陽人志趣高遠不肯諧俗與人落落不合隱居讀書處貧安分視勢利澹如也雅好爲詩清新俊逸一字不苟至正癸巳冬叛卒陳安國據城以禮訪之昂弗見挈妻子隱西華山中事息始歸僉憲宋伯顏不花高其義屢薦不受有詩傳於世

文行先生鄧牧心牧

鄧牧字牧心錢塘人生十餘歲讀莊列二子書悟文法下筆追古作者不事榮名遍遊名山大川歸隱大滌山人稱爲文行先生所居有超然館宴坐累月不出時時作詩文以自娛每一篇出人爭相傳誦與葉林李坦之友密石塘胡長孺爲作傳所著有洞霄記游山志雜文稿

陳允文

陳允文瑞安人賦性耿介不樂仕進每慕徐孺子陶靖節之爲人盡取靖節所爲詩而和之其與人交無一毫

疑偽意望而知爲佳士常賦詩鼓琴以自娛雖嗜酒里
大姓有不能屈農者之招或時赴焉旣醉嘗坐茂樹臨
清泉散髮濯足翩翩然物外人也年五十不復執筆凡
有述作輒口授子弟書之年八十餘卒

何介夫景福

何景福字介夫淳安人爲人學博行修超然獨立以所
遇非其時累辟不赴惟詩酒自娛以終其身所著有鐵
牛翁詩集一卷行於世

李寧之康

李康字寧之桐廬人事母篤孝人稱李孝子從永康胡
仲孺游工詩文博及書画奕奕無不冠絕一時素以功
名自許兩試藝不售輒弃去以古學自鳴元至正二年
郡守馬九臯遣使幣聘不起九年張奉使高其行又起
之復辟十六年宰臣塔失鐵至邑卽遣幣命縣令羅良
誦請議事康不得已而往極談當時得失欲官之以母
老懇辭而歸未幾以疾卒高陽許瓊青田劉基臨其喪
爲詩文弔之所著有杜詩補遺桐川詩派梅月齋永言
看山清暇集各若干卷藏於家

葉拙修孟傳

葉孟傳字拙修定海人隱居讀書不求聞達爲文根極理要手口互宣而縱橫曲折無不如意每一篇出四方傳誦以爲文矩及門受業者踵相接也舌耕自給處之晏如未嘗以貧故少屈於人當時以爲石隱

陳象賢子翬

陳子翬字象賢奉化人負器幹精藝文書法李北海嘗爲慶元路教授因國事日蹙遂隱居田里經生學士慕其德學執贄受業者羔雁成羣家雖貧束修之外無妄受每風晨月夕輒載酒溪山之上與高橋章壘甬東鄭奕夫輩賡唱迭和以發抒懷抱所著有思刻集藏於家

黃伯成玠

黃玠字伯成定海人寶章學士震之曾孫也自幼服膺先訓博洽無不通志尚卓然不隨俗進退躬行力踐以古聖賢自期隱居教授孝養二親聞其名者爭遣贄迎致之每渡浙而西富家宦族尊其德學爲築館舍貫田產以居之當時以方邵堯夫之在洛也樂吳興山水之勝卜築弁山遂號弁山小隱與趙文敏子昂黃文獻晉

卿相友善所著有弁山集知非稿纂韻錄唐詩選各若干卷行於世

大癡道人黃子久公望

黃公望字子久富陽人聰敏絕倫通百氏說尤工画山水運思落筆氣韻流動画家有極力不能追者每擬其為僊人得其片紙皆寶之元至元中浙西廉訪使徐琰辟為書掾不就遁去更名堅號一峯又自稱大癡道人放浪江湖年八十餘卒

董靖傳嗣杲

董嗣杲字靖傳錢塘人隱迹黃冠中博辯強記談前朝典故如指諸掌作詩詞不經思索下筆輒成有西湖百詠詩行於世

句曲外史張伯雨天雨

張天雨字伯雨錢塘人宋文忠公九成之裔早弃妻子隱於黃冠風裁凝峻見者知其為方外高士工書善詩歌文益奇古與吳興趙孟頫浦城楊載蜀郡虞集豫章揭傒斯清江范梈金華黃潛交甚善嘗屏居修茅山志因自號曰句曲外史

陳時敏

陳時敏瑞安人習易書能推步天象嘗受學於陳堯佐每心領神會於不言之表故其術尤精閩浙間言曆者必推本於溫曆後隱居山中時人以陳詳議稱之至正壬辰歲正月朔日食能辨司天臺推算之差郡聞於朝遣翰林學士范天碧以禮徵之不赴後差茶司提舉李鶚促其行終不起年七十四卒於家

陳渭叟

陳渭叟杭人也讀書學道不混於俗賦詩有天然之趣

隱居葛溪歲一入城名人勝士爭要致之惟恐其去也所著有紫陽編若干卷葉森嘗贈之詩云一度詩來一見君只應芳杜襲蘭薰有時寫到遊仙句繞筆秋香生紫雲

梅花道人吳仲圭鎮

吳鎮字仲圭嘉興人性高介隱居不仕工辭翰尤善画山水竹石每題詩其上當時稱為三絕有勢力者求之多不得惟贈貧士使取直焉以愛梅自稱梅花道人未歿時嘗自題其墓曰梅花和尚之塔

貞白道人朱景仁

朱景仁海寧人。事父母以孝聞。有異母兄二。事之甚恭。同居共爨。始終無間言。待宗族煦然有恩。外嫗亦如之。交友敦相恤之義。元季之亂。四方衣冠之士。避地海寧者。景仁悉解衣推食與同甘苦。屢徵不就。自號貞白道人。

沈元吉貞

沈貞字元吉。長興人。甘貧力學。雖在畎畝中。手不釋卷。宅傍有一井。冬夏源泉涌流。溉田數百畝。元吉往來吟咏其上。絕無仕進意。著茶山稿十二卷。

雲林生崔彥輝

崔彥輝錢塘人。自號雲林生。與王叔明皆趙文敏甥。善篆隸詞賦。畫亦超詣。隱居賣藥於塩橋市口。不二價。當時以為壺隱。

韓進之循仁

韓循仁字進之。金華人。明經。潔行。隱居授徒。一時名士如宋濂吳履皆其深交。元末兵起。避地永康之岡谷。以山水文集自娛。貧屢無所介意。所著有南山集。

樗散生李孟言詞

李詞字孟言錢塘人號樗散生元末受業於會稽楊維禎負氣節善爲詩賣藥金陵市中病者趣其門無弗與者所與無不立差蓋賢而隱於醫者也

居林子金建

金建瑞安人有學行隱居不仕以春秋教授不爲詞章記誦之習而以躬行實踐爲急人有善亟稱之有過輒面折不少貸士大夫翕然尊慕之至正間方氏海艘犯境首獻策令築城備禦郡賴以安省府聞其名交辟之徵爲秘書管勾不起優游田里以居林子自稱及方明善據郡以禮延致知其終不爲已用遂不強未幾卒

顛公鄭君作天祐

鄭天祐字君作淑公之後也少磊落不羈知元運將革自負豪傑之才耻與牛駑同皂遂處南湖塢中是爲南湖處士至正末天下益亂上下溷賄競爲饕餮降其風而化之乃憤然有回淳返朴之志恤恤然調貧鮮寡以媿世之貪鄙者漫游四方齋餘貲凡遇生物無大小貴賤卽鬻而放之如是者十餘年人不能測其所藏咸呼

高隱 卷之四十四
爲顛公。晚年每辟火食。日醉醇酒數勺。微醺輒麻鞋散髮。走道上。暢歌屈原漁父篇。以自況。或勸之仕。乃喟然漫答曰。而不見飛。燕氏馬乎。其一朱鬣白毳龍髯。鳳臆。終日不釋轡。卒以熱死。其一垂頭昂尾。駝頸駱膝。蹠齧善蹶。弃諸野。終年而肥。古之達者。固不苟潔。以罹患。亦不避穢。以養精也。人益不測其所藏。第稱之曰顛公。而顛公亦以顛終其天年。

章德一

子橫塘附

章德一。歸安人。十歲能文。比長。不樂仕進。學士程雪樓

薦之。不起。積書萬卷。從學者遠近畢至。有悠然先生集。子橫塘。號丹霞仙客。有稽古之學。善畫蘭。家貧。鬻蘭爲食。不苟取。與洪武初。召拜知府。對曰。臣有布政才。以下官不能也。辭弗就。宋景濂以詩贈其行。

鄭彥淵謚

鄭謚。字彥淵。金華人。晦迹衡門。不求聲譽。攻陰陽曆數之書。嘗註郭璞葬書。以爲獨詣。後聞其友葉儀。范祖幹之論。方知正學。刻苦研窮。晝夜不輟。有心學圖說。蘓伯衡。胡平仲爲之序。

高隱
明 共四十八人

陳子才

陳子才海鹽人。生而神俊，喜讀書，凡五經六藝，諸子百家，無不通解。尤善丹青，點染自娛，不輕爲人下筆。當元末兵亂，隱居不仕。日焚香靜默，獨觀元化。洪武初，下詔以人才徵，弗就。有司爲之勸駕，卒不起。或問之，笑而不答。年四十歲，旦忽命童子折梅花一枝，侍於側，自繪其像，形神宛然，閣筆端坐而逝。

施德華

施德華烏程人，性樸素，能詩。洪武中，有司以明經累薦，不就。結屋數楹於郡城南，自號城南小隱。

呂宗學九成

呂九成，字宗學，與兄不用九思齊名，時稱新昌三彥。自以宋室世臣，不肯仕元。兩兄倜儻有才氣，而九成澹泊雅循，時時誦說溫公晦庵之書，言動由禮，不與時移易。其後兩兄以徵辟仕本朝，九成竟隱約終身。絃歌自適，欣如也。同宗子弟咸敬事九成，如嚴師。嘗戒子弟勿游市井，曰：此最壞人心術。後百餘年，天水胡纘宗行部至

新昌乃爲九成勒石題曰逸民之碑

薛原禮敬

薛敬字原禮鄞人宋進士朋龜九世孫也容儀魁岸稽古好修嘗典教象山秩滿調鄞時元政不綱退隱於鄉以醫術自晦國朝公卿大夫凡蒞茲土者聞其賢必虛左以迎訪問時事生民利病言之詳懇而未嘗及私公卿大夫皆嚴重之以爲碩德之隱

汪師道與立

汪與立字師道金華人受業於范祖幹其德行與何壽朋齊名而文學稍優嘗謂學者當視古人爲不足毋視今人爲有餘人以爲名言隱身教授不干聲譽優游林泉以高壽終

胡仲厚敦

胡敦字仲厚鄞人家世業儒潛心經史得其指歸與後學講說懇懇不倦晨夕衣冠如對大賓雖童稚必束帶見之人有過未嘗發諸口每芳辰勝旦衣冠高會賡唱迭和若與世相忘旁精醫卜而尤工寫山水人物頗自秘惜非其人雖投以重幣弗屑也輕財重義人甚高之

夏義甫

夏義甫，鄞南人。少以孝行稱。博學好古。值勝國兵亂，築室天目山，杜門避影者四十餘年。與張羽、劉佐、周倬、沈貫諸君子相為師友。每有得，輒為吟嘯。又善畫，今傳於世者，天目山房圖，蓋其得意筆也。

楊大本立

楊立，字大本，諸暨人。性孤介，言行無偽。嘗結廬祖墓，課農圃，善吟咏，非其力之所出，不衣不食也。時人稱古逸民。著有蝸鳴藁。

少微山人陳德詢

陳德詢，松陽人。博通經史，雅志高尚，獨立不羣。性喜吟尤好山水，每逢勝處，輒延佇遐想，思入風雲，題咏務求奇絕。一時名士多推下之，益以詩自豪。厭薄軒冕，屢聘不起。自稱少微山人。所著有少微集，蓋少微乃括蒼星次處士淵藪，其所號著，殆有託而逃云。

董宗楚荆

董荆，字宗楚，新昌人。曾之子也。博學好古，長於詩文。尤善畫，每含毫吮墨，以寫其遠意。國初隱居不仕。洪武十

七年、舉博學宏詞。上親問治道、稱旨、授縣丞、辭不就。終老於家、所著有翠微漫稿。

紫芝老人俞子中和

俞和、字子中、杭人、號紫芝生、隱居不仕、能詩、喜書翰、早年得見趙松雪運筆之法、臨晉唐諸帖、遂能入神行草、摸松雪得其骨力、高處咄咄逼真、暮年更號紫芝老人、不復執筆、以故傳世絕少。

竹溪逸民陳澗

陳澗、烏傷人、幼治經、長誦百家言、為文喜馳騁、意功名、可以赤手取、一旦忽弃去冠、青霞冠、披白鹿裘、不復與塵事接、所居近大溪、篁竹脩脩、然每當水月爭灑、時輒腰短簫、乘小艇、蕩漾空明中、簫聲挾秋風、為豪直入無際、宛轉若龍鳴、深泓絕可聽、簫已扣舷而歌曰、吹玉簫、今弄明月、明月照今頭、成雪頭、成雪、今將奈何、白鷗起、今衝素波、望冠之者、以為謫仙人、時澗已五十、益恬淡、無所繫、間私語其友曰、吾於世味愈孤矣、將漁於山、樵於水、其友以為誕、澗曰、樵於水、意不在薪、漁於山、意不在魚、是無所利也、無所利、則樂矣、君子以其言近道、相

與敘而傳之稱竹溪逸民云樂夫君子以其言

歸全先生何德齡壽朋

何壽朋字德齡金華人受學於葉儀窮理守道隱居教

授一介不以干人洪武初舉孝廉以二親俱老舜父歿

舍所居宅易地葬焉學者因其自號歸全咸稱曰歸全

先生

烏性善本良

烏本良字性善慈谿人幼與弟斯道同席研書樂潛味

道父歿儲無甌石舌耕養母時斯道方弱冠而二季三

妹皆在齠齔仰賴不足遂教授錢塘以自資時大家有

欲以女妻之者本良力辭曰此來爲母與弟妹衣食計

耳所願未遂何暇言婚後撫二季稍長畢嫁諸妹然後

娶一日得慈湖楊文元公遺書讀之自謂如坐春風中

遂以春風名齋終其身抱德於潛而窮經以老卽古之

孝弟力田者何以加焉

孫蔗田 包太白附

孫蔗田不知何名錢塘人隱於西溪不受徵聘以詩文

自娛樂所著曰蔗田集與同邑包太白名行相參時人

目為西溪二隱

王復初紹原

王紹原字復初山陰人自幼嗜學治毛詩刻意吟咏伯仲五人值元季兵亂家盡毀紹原偕諸弟攻苦食淡恬如也及海內既平於舍傍闢一軒扁曰耕讀與常所往來者觴咏其中灑然免於世累所著有耕讀集行於世

灌園生潘時雍

潘時雍錢塘人性簡淡力學隱居郡城之東自號灌園生詩多奇語字亦遒勁為徐大章賦獨樹軒詩膾炙人

趙廷堅檜

趙檜字廷堅江山人性聰敏負氣節博學能文少孤母周嘗粥飯遣就學於百里之外既歸母流涕語檜曰吾始可見若父於地下矣隱名養母終身不仕有一齋集十二卷藏於家

香雪坡老人王用賢毓

王毓字用賢鄞人貌清而癯性溫而厲讀古人書以自淑嘗慕宋廣平林和靖之風植梅庭下雖凝陰沍寒焚

香默坐對之不去。自號香雪坡老人。先游錢塘。無識者題詩城隍廟壁曰：行盡錢塘數十家，無人為我煮新茶。一襟清思難消遣，嘔出曾中萬斛花。由是人競延請，拂衣而歸。

文莊先生胡希華榮

胡榮，字希華，婺之湯溪人。居家孝友，名動鄉閭。蒐獵百家，旁通九藝。鶉居鵠飲，超然獨立於塵埜之表。守令高其行，每迴車過之，踰垣不見。年七十，以疾終。門人私謚為文莊先生。所著有澱洲漁唱集。

王志道達

王達，字志道，錢塘人。足一跛，家貧賣藥。博究子史百家，客至輒談今古，衮衮不休。人知其辨博，每以疑事質之，應答如響。所著有蘭芷集。

陳光大煇

陳煇，字光大，慈谿人。丰儀如玉，衣冠灑然。讀書過目不忘，旁通曆數之學。洪武中有司累薦不起。晦迹林下，畜雞豚，藝果蔬，釀秫為酒。時與賓客昆弟酣歌笑詠，傲睨乾坤，同里余處道邑令余瑄，薦其行強之仕，辭疾弗就。

皆稱高尚。余欲徵焉。今余寧無其孫。或云出於後。或云

陳孟熙雍 鄭壁夏誠附

陳雍字孟熙。仁和人。父士寧。涉獵書史。與同邑鄭壁夏
誠莫逆交。並不事榮利。日為湖山游。又皆畜古法書名
畫。彝器之屬。時時過從。品鑒相賞。士寧與壁母皆年高
在堂。造必升堂。謁拜如所生。母歿。互為服。總三人交義。
風動一鄉。壁之子孫誠之子。皆登進士。惟雍樂志幽隱。
縣大夫兩以明經舉。皆不就。世居鹽橋。厭其囂塵。徙城
北獨山之陽。事畊釣。若將終身焉。年四十二卒。無子。
人多惜之。雍家素裕。無他兄弟。士寧獨教之。篤自幼通
五經。而尤長於易。為文不構思。頃刻滿紙。為詩亦豐腴。
可喜。以學瞻氣克故也。父子俱葬獨山。人稱曰世隱。

迂叟金宗實華

金華字宗實。鄞人。洪武間。從戍燕山。值文皇靖內難。守
通州有功。召見。時弟忠以近幸。授兵部尚書。上欲推
恩與華。華辭不就。賜歸。徙東湖韓嶺。居焉。足不履城府。日
坐斗室。耽玩經史。朱墨不去手。朋從往來。以詩酒為樂。
興至。則泛舟湖上。吟風弄月。竟夕而還。後尚書迎養於

金臺官舍未浹旬。謂曰。萬鍾之富。其如我湖山樂何。遂拂衣歸。永樂乙未。尚書卒。復召見。賜白金文綺。華伏闕謝曰。臣布衣野人。不敢用此。上稱爲迂叟。一日讀宋鑑。至王倫秦檜事。撫掌發歎。脫頤而逝。人稱爲白雲先生。

胡寶之拱壁

胡拱壁。字寶之。淳安人。天性孝友。穎敏好學。經史諸子。百家皆通。其大旨恬澹閒雅。不以事物經心。兄莊懿公。旣貴。顯韜晦愈深。足跡不履公府。邑行鄉飲。雖加賓禮。終不能致家。居惟讀書吟咏。或寫蘭竹魚鳥以寄意。六十年餘。不變所守。鄉縉紳先生論其人品。以爲可方古之逸民。所著有更拙稿。陶情稿。藏於家。

南園居士沈昌甫啓隆

沈啓隆。字昌甫。其父漁隱公。居吳興勝國之季。一旦弃妻子。逃之五湖。隆遂徙嘉興郡城之東。水南有園。日吟嘯其中。自號南園居士。後徙思賢鄉。叔子禮。仍處舊廬。構有草亭。玉峯。夏太常。杲圖。其亭勝。并顏東郭草堂四字。鏤二石以傳。

向永脩道淳

向道淳字永脩慈谿人幼傳家學得慈湖寶峯之宗架
挿遺文多宋僕射薌林舊籍精研博采反求於心卓有
匡濟天下之志及父朴死靖難哀衣冠葬陽嘉山手樹
松楸洒泣輒枯遂弃科舉業杜門教授事母徐極盡誠
孝與顧慤爲忘年友慤被召顯榮欲與彙征淳笑不應
州邑重其孝隱薦辟交至竟稱痼疾不起

懶仙賈必明愚

賈愚字必明杭人少以周易爲郡博士弟子員試藝屢
絀遂弃去因自號懶仙布衣簞瓢儵然自得日旁搜博
采求古人之所用心寄興風月放懷山水其於末俗紛
華聲利泊如也居家孝友尤精翰墨得其片紙者居如
奇貨蘊德弗施論者惜之

周益褒陞

周陞字益褒慈谿人爲人介特隱居不仕家居市廛一
室如舟所儲書史外無他長物因號書舫齋爲詩詞格
調高古不類時人每酒酣擊節歌陶淵明詩四顧慷慨
旁若無人

章克平總

章總字克平會稽人性孝友博學工詩宣德間兩徵不起風節凜然爲世所推魏文靖銘其墓曰隱遯不汚南村一人而已

溪雲先生錢珏

錢珏慈谿人古道自力不慕榮名雖獨處燕居不廢冠履遇天日晴美輒游里閭間步履有循而儀觀整肅不問皆知其爲溪雲先生也性好吟咏口吃若不能言至其爲詩清麗雄渾得少陵家法有和唐音溪雲稿行世

朱從儒

朱從儒嘉興人初從羽士沉酣老莊已復潛心周孔爲博士弟子尋弃去崑居川觀或遊戲筆墨間摹山水花草人物皆入神品爲人豪宕睥睨塵世滑稽似東方朔志慮似郭有道高潔似徐孺子或謂其有簡道玩世風

吳琬

吳琬長興人勵志讀書不屑舉業築室董塢山與安仁劉麟金陵龍霓關西孫一元歸安陸崑結社湖南稱吳典五隱郡守劉天和每有請質必造其廬琬精邵子皇

極數博極羣書所著有三才廣志三百卷史類六百卷藏於家

胡用良禎

胡禎字用良新昌人甘貧慕古絕跡城市士大夫聞其名或造廬見之結草亭於宅外聚古今圖籍終日吟詠其中不慕仕進所著有草堂愚辨諸書古淡平實有關世教與江浦莊景嘉禾呂原以詩文友善景嘗寄以詩云聖主狂奴自古容溪山此意便無窮誰知宇宙千年病我與先生一樣風越水以東唯剡曲子陵而下幾漁翁閒忙莫問今誰是時止時行道只同其見許如此

袁良貴仁

袁仁字良貴嘉善人父祥祖顯皆有經濟實學至仁愈邃天文地理曆律書數兵法水利之屬靡不熟諳謂醫賤業可以藏身濟人遂寓意於醫崑山魏校疾召仁使者三至弗往謝曰君以心疾召當叅阻仁義炮治禮樂以暢君之精神不然雖十至弗來也校疾愈訪仁與語三日大驚遂定交焉顯嘗作春秋傳三十卷祥作春秋或問八卷以發其旨仁復憫世儒溺胡而弗信也作鍼

高隱 卷之四十四
胡編以闡之爲文根本六藝片詞尺牘率關世教詩斐然逼唐卒之日沐浴更衣坐正寢呼筆題詩有附贅乾坤七十年飄然今喜謝塵緣之句投筆而逝

岑子英俊

岑俊字子英慈谿人隱居雲崑學通經史工草隸詩逼漢晉嘗授業吳興有錢氏子負所寄一無所讀由是人目爲長者正統間舉經明行修以親老舜平生悞悞無華口未嘗言人過至治家喪葬一以禮年九十疾革猶與客誦所評魯男子詩云雨崩隣嬾屋風裂夜難禁閉

戶却逃難全無惻隱心語畢奄逝

許半圭璋

許璋字半圭上虞人淳質苦行潛心性命之學嘗躡蹻走嶺南訪陳白沙先生其友王轅以詩送之曰去歲逢黃石今年訪白沙王文成初養疴陽明洞唯與璋及王轅輩一二山人兀坐終日共參道妙互有資益其後擒逆濠成功歸每乘筍輿訪璋山中菜羹麥飯信宿不厭璋歿文成爲題其墓曰處士許璋之墓璋於天文地理及孫吳韜略奇門九遁之術靡不精究正德中與文成

游嘗西指曰帝星今在楚數年後君當事之已而文世廟龍飛興邸其占多奇中類如此

寒溪子方元素太古

方太古字元素金華人少警敏博學能詩有聲縉紳間居女埠溪上自號曰寒溪子性好游放舟三吳中與姑蘓楊循吉都穆文徵明相唱和已而入武夷稱會孫謁天姥登九鯉湖尋九何君煉丹處復歷探匡廬九華句曲秣陵諸名勝以山水之奇供其揮灑而詩益工晚好黃白術歸隱金華解石山中不入俗者才餘年老乃返寒溪故居其詩頗似郊島大率感時憤俗之意爲多所著有寒溪集藏於家

蛻巖道人王貞翁埜

女藥屏附

王埜字貞翁山陰人生有異稟家貧肆力經史絕意仕進築室卧龍山南教授自給守介而氣和鄉人士雅慕重之郡守洪珠屢造其廬扁其堂曰逸士晚歲喜讀易習養生夷猶山水間自號蛻巖道人壘石爲生壙於亭山之麓題曰小芙蓉城爲詩冲澹自得書法逼趙吳興所著周易衍義蛻巖詩集餘多不載埜無子有女曰蘄

屏少寡。依父以居。女紅精巧。每有所製。人爭購之。以自給。能詩。然不多作。發居十餘年。先父歿。歿而檢笥中得詩數十首。每焚香誦經。有詩云。禮佛焚香易。修行定性難。古來成道者。心肺鐵般般。葬小芙蓉城側。鄉人題曰。節婦王蘩屏墓。壙歿鄉人思之。請於郡守梅守德。即故居立石曰。王隱士里。

王時雨澍

王澍字時雨。錢塘人。性高亢。不諧於俗。讀古史諸書。為詩多獨創語。寄興山水。自號山人。人人亦以山人稱之。貧

鮮擔石儲。而意常豁如一。介不苟取。高談論世。自比英傑。與士夫鼎貴者游。口未嘗言貧。終身無所干請。人以是益賢山人。先是客游京師。與胡端敏同還。至滄州。遇賊劉六等數萬人圍其城。數日不解。山人為州將。畫方略。賊即遁去。端敏大奇之。欲薦之朝。山人力辭。卒以布褐終其身。

李文正端

孫循義附

李端字文正。鄞人。天性好澹。不嗜名利。隱居畊。讀以吟詠自娛。與金太僕湜。倪處士光。魏學博。偁。締為詩社。東

夷貢使歸乞詩爲贈有肩擔雲影江頭別衣帶天香海上還之句夷人傳誦以爲不減王右丞孫循義舉嘉靖癸未進士爲諸生時屢不得志於有司上書自陳主司大怒欲加譴乃試以滄海遺珠賦卞和泣玉論蓋窘之也循義應命而成文不加點竒詞奧義讀者每不能句遂以才名聞天下聞其姓者莫不稱曰不稱曰人必稱其姓蓋其

王潼字本澄錢塘人幼嗜學從王伯安先生講道稽山獲聞良知之旨攻苦力學而性好游慕司馬子長之爲人歷齊魯燕趙登泰山覽日觀西望太行薄游都門論海而南遵吳適越東下武昌訪竹樓赤壁之勝一以山水之竒發之筆墨間點染吟詠率多竒致其過太行詩有客中秋過半山外晉全分之句勤著述於陰符經程張諸書皆有補註抗志風塵耻與時俯仰終身不求榮利日以登涉自娛嘗自品曰亂山秋寺孤燭苦吟平生滋味也嶺猿江鳥冷荇幽蘭平生朋好也老牛負載跛鱉蹣跚平生技能也黍離麥秀吊古懷賢平生寄託也濁酒一壺南華一卷平生心知也雲停春渚月滿秋空

平生意態也。卽此數言，可以想見其標韻。

楊汝鳴珂

楊珂字汝鳴，餘姚人。始爲諸生，稱祭酒。已從王文成游，稍厭薄時祇會沙汰例嚴督學使者檢察過當。珂歎曰：是豈待士者哉！遂拂衣歸隱，居秘圖山，養母以孝聞。餅粟屢空，晏如也。爲詩瀟灑，不羣。書得晉人運筆法，而自成一家。晚歲益夷曠，飲酒浩歌，終日不亂。遠近咸愛敬之。

李元昭用晦

李元昭字用晦，杭州右衛世爵千戶侯也。少尚節俠，好遊冶，日與里中諸少年呼盧蹴鞠，臂鷹走狗，以爲樂。年二十六，始折節讀書，咀嚼墳典，至忘寢食欲，手拾青紫，以一洗世弁之陋。顧才通命塞，屢試不售，不得已始襲祖爵。顧視堯叅如積穢，在首心弗善也。遂弃去，避居靈隱寺之西澗，築一室如斗，引澗水環於席下，蒼松翠竹，周迴籬壁間，人跡旣絕，唯有泉鳴鳥啼與書聲相爲和。答輿至，攬筆按爲韻語，神與境會，言言逼真。久之，機融趣淡，工深力到，直闖漢魏之藩而窺其室。六朝以下不

屑形之筆底。一日忽自歎曰：古之善詩者，莫不浪跡寰中，遊神物表，故能目通萬里，思接千古。今方爲醜雞，轍鮪而欲與垂雲之翼，撐日之髻，料天地江海之高深，惡可得哉！遂以六尺筇挑雙不借拂衣出門，由徑山登兩天目，入黃山白嶽，觀所謂天子障者，度天台石梁，至於雁宕上武夷，登幔亭，求魯孫，故燕處躡香爐，峯頂含瀑，布泉而漱之，日月俱淨，遂由九華抵秦嶽，登日觀，觀日出，赤光蕩昱，如金之在鎔，遂走燕雲，歷九邊，倚筇長嘯，驚沙欲飛，益覺撫劍者之爲陋。於是迴登嵩嶽，掃捷徑

於終南，西陟華山，採蓮花於玉井，極於南服，衡嶽爲最，探齊雲之梅，榔撫洞庭之湘竹，順流揚舲，艤於赤壁，求折戟於沉沙，覺曹瞞之膽猶然，欲墮。凡高高下下，巔齋所觸，無不筆之爲詩，奚囊俱滿，遊總八年，而後歸。故隱復自歎曰：詩之爲道，不凌高則氣不暢，不極隱則思不幽，凌高極隱已而不言志，則辭亦不達。予志在五嶽五嶽，莫勝於衡山，而予南服之民也，蓋嘗夢寐朱陵，而徘徊紫蓋矣。因自號曰峒嶺山人。山人旣歸，詩名逾重，四方名流，韻士過武林而不一見，李山人如浮洞庭，不嘗

橋也。然山人亦不厭客。煮茗焚香。終日清言不倦。客或一言及俗。輒起擊石磬數聲以代清耳。當道慕其名者。或鳴騶相過。卽撻戶不納。葛巾野服。輒欣然相對。晚結西湖詩社。操觚之士。以不與爲耻。山人四十一掛冠而隱。隱十年而雲游。雲游八年而還故山。復高卧二十餘年而後死。人以爲蟬蛻云。所著有雲遊稿。農唱集。若干卷。行於世。

天隱道士邵汝宣穆生

道士名穆生。姓邵氏。一名重生。字汝宣。仁和人。比部員

外郎。經邦之仲子。生而負奇骨。相磊落。音吐弘亮。少爲諸生。不屑科舉。比耦之學。年三十餘。卽屏居靈鷲山之呼猿洞。手鑿岩岫。得勝處。卽取材於山。營構軒閣。不用梓人而曲者中鈎。直者中繩。員者中規。方者中矩。榱桷椽杙。無不合作者。四圍皆茂林修竹。復於隙地。雜藝花藥。杞菊。曉起手自斟。漙欣然自得。曰。此吾山中良友也。所貯書。自六經二十一史而下。多古文奇字。玄筌秘笈。之文。晨昏披覽。足不入城市者四十餘年。性孤僻。高簡對俗子如仇。未嘗輕假色笑。而俗子亦詫遠之。當道有

耳其名者多鳴笳過之輒踰垣遞去至毀薪柝屋終不與一接惟是高僧韻士酒徒墨卿扣扉卽啟筵鐘卽答典至卽浮白長嘯與哀猿警雀相唱和終日夜不勸也客或言猥俗卽揮杯塞其口或言忠孝大節及人間不平事則慷慨而起若不惜以身殉者尤好山水遊凡杖履所及輒以筆貌之丘壑竒邃烟雲變幻未嘗襲古人一筆然無一筆不自古人中來重自珍惜不肯爲人作以是傳世者絕少詩稱唐而不模擬唐格選選自快胸臆類李長吉然亦無意也生平寡嗜欲簡言語其潛修

密証人多不能窺其微獨見其晝夜跌坐脅不抵席者二十五年癸巳四月忽勒辭於石曰某年某月某日某人試天劍於此至丁巳三月忽倒身臥胸突生一骨痛不可忍卽猛然省跌坐如昨而痛骨立消於是召子于巖來命之曰速爲我治龕我死踰月卽葬於此山之巔冢上置塔塔覆以亭毋他易遂卒年八十有一未歿之前三日斷穀食飲水四五斗遷居樓下危坐靜存端寂而逝目將瞑一僧欲焚香唱佛爲導師忽張目大喝曰羲文孔子吾師也佛吾友也吾不念佛其定力堅毅有

如此所著有武林山七誌山中甲子陰符黃庭經註各
數十卷虞長孺先生題其塔曰天隱道士邵汝宣之藏
室而黃貞父先生爲之銘略曰承義文師爲巢許隣百
家二氏或友或臣蟬蛻塵埃四十餘春高卧青山逍遙
玄津巍然一壟身隱道伸我銘爾式千載若新

兩浙名賢錄卷之四十四終

書